

# UYO UULI MULI IMWE



Natotela, Munyina Neville. Shikulu akupale.

Lekeni tube fye abaiminina pakashita ilyo tulepepa. Lekeni tukontamike imitwe yesu nomba. Kabili bonse abalefwaya ukwibukishiwa muli ili pepo, imyeni amaboko yenu no kusosa, “Lesá, nine.”

<sup>2</sup> Mwe ba Mushilo kabili Lesa uwa Kutemwa, tuleleta aba bantu ku cinso Cenu, ne fya kulomba ifyo bakwete. Bacipusha ku kwibukishiwa. Kabili, Shikulu, ukuboko kwandi pa mulu nako. Ndepepa kuli Imwe ukuba no luse pali ifwe. Imwe mwalishiba ifya kukabila fyesu, kabili kuti twapepa, nge fyo Imwe mwatusambilisha ukupepa, “Ubufumu Bwenu bwise. Ubufwayo Bwenu bucitwe pe sonde, nge fyo caba mu Mulu.” Tata, kuti twalomba muno bushiku pa luse, ku buntungwa bwa Mupashi, pa kutila twingaba abalinga ukuleta ku bantu Iicine ica Mbila nsuma, kabili ici eco twacetekela ukuba Imbila ya ino nshita, ku Lukuta Lwenu. Shikulu, ukupepa ukutula ifwe tuli iciputulwa calulyo Lukuta ulo ululi no kwitwa mu nshiku sha kulekelesha! Tata, nga tatuli cilye ciputulwa, lyena sokololeni kuli ifwe ifyo tulingile ukucita ukuba cilye ciputulwa. Kabili tupeni nkumbu, amaka, muli ino nshita ya kwesha ili pe sonde ku kubesha abo abaikala pano. Tupeni Umupashi Wenu uwa Mushilo, ku kutosentelela no kututungulula, pa kutila ifwe mukulekelesha, pa mpela, twingesa kuli Imwe mu mutende, pali ulyo Mweo uwa Muyayaya uo abacetekela bonse balolelepo ukutula ukutendeka kwa nshita. Twafwilisheni, Shikulu. Twalombela mwi Shina lya kwa Yesu. Amení.

Kuti mwaika la.

<sup>3</sup> Ndetasha mucine cine pe shuko ilya kuba kuno lubali muno bushiku—muno bushiku, kabili na pa nkumbu shakwa Lesa isho shapelwa kuli ifwe ukupitila muli Yesu.

<sup>4</sup> Elyo kabili palwa i—Imbila mu lucelo, nomba, ndefwaya cila umo ukumfwikisha bwino bwino. Nomba, ndesubila kuli Lesa ukutula Yena taili ilya nshita. Mwamona? Lelo Imbila yena ya cishinka. Imbila ya cine. Ili no kuba, ili no kuba inshita imo, nga ino te ilya nshita. Kabili cilemoneka sana kwati ni nshita, mpaka naumfwile nga Paulo uwa kale, uyo wasosele, “Nshakwinda ukulanda kuli imwe ukupanga konse,” mwamona, ifintu fyonse ifyo filingile ukucitwa.

<sup>5</sup> Kwacibako icintu cimo ico nacitita mu lucelo, cilya munjeleleko ukutula nacisisosa. Ine—nacilumbula ishina lyakwa munyina uo ndetontonkanya ali mu cilubo. Ine nshacilinga ukucita cilya. Nshilumbula ishina lya muntu;

kabili nga tepu ikafika mumaboko yakwe. Kabili ndefwaya ukumumona no kulanda kuli ena, pantu ndetontokanya munyina, umuntu umukalamba, umuntu umusuma uyo washimikile kuno kwine mu cintamba, Munyina David duPlessis. Kabili nshacipilibula ukwita ishina lyakwe. Naciba uwasakamana pa Mbila, kabili na fimbipo, inga cakutula ino e nshita, kabili nacilumbula ishina lyakwa munyina. Ine nshicita cilya. Njeleleniko nacicita. Nalitemwa Munyina David duPlessis. Ena ni munyinefwe, kabili ine—ine ndetontokanya ukutula umuntu uwa cenjela nga ulya alingile ukusambilishiwa nganshi mu Malembo.

Ndemweba ifyo cena cili. Cena cili, ukulanshanya uko David na ine twakwete. . .

<sup>6</sup> Ena inshita imo alinandile ko mukulongana. Ashimikile ukufuma kuno kwine kuli ici cintamba, atemwa chalichi iya kale, kuno kwine ku cintamba. Kabili munyina wakwe, Justus, ali ni kelula wandi mu South Africa, uko ndebwelela. Kabili bena bafuma mu lupwa ulusuma, inga'nda ya Pentecostal, umuntu umusuma nganshi. David ali, ndecetekela, uwa kucipuna, pa nshita imo, uwa Pentecostal Assemblies ye Sonde, kabili pa Musonkano uwa Pentecostal uwe Sonde. Ena ali umu pa ba kucipuna. Kabili pantanshi aishile ku United States nokwikala mu, mulya mu Texas, na Munyina Gordon Lindsay, elyo kabili atendeke fye ukushimikila ukushinguluka mu ncende ishampusana pusana.

<sup>7</sup> Lelo ifyo cena cali, uko ndetontokanya ukutula munyinefwe musuma apangile icilubo; kwati fye isambililo lyandi, atemwa onse uwa shala; ena atendeke ukubombela pamo na ba kankala. Ena atwalilile ukulanda pa lwa Princeton University kabili ne ncende isho shalemwita, ukutontokanya ukutula ena alecita cilya icali icalungama kabili alepela icakulya ca fitekwa mulya mwine muli mashini; mwamona, kabili ukusangalala kwa musango filya!

Kabili te cilya fye ceka, lelo ba Shimakwebo Abaume Aba Mbila Nsuma yonse, abo abalipilila ukulongana kwandi, isonde lyonse—lyonse. Mwamona? Ine—nalitemwa balya abaume, mwamona, lelo ine mucine nshisuminishanya pamo na bena pa mafunde ayo bena—bena baba—bena bali. . . Bena bakwata—bena balitaluka ukufuma kuli finshi, amafunde yabo, balitendeke, kabili nomba balesa mukuba fye nga kabungwe akali konse atemwa icintu icili conse. Mwamona? Kabili ifyo cena caba, bena tabaleesha ukuba ba pentecostal, lelo bena baleesha ukusankanya pentecost kabili na fyonse ifya cena capamo.

<sup>8</sup> Kabili cilemoneka kuli ine nga ulya Munyina duPlessis, uwawama, umuntu umusuma nga ulya, kuti aishiba ifingi palwa Malembo ukutula ilyo amona bana cisungu abalala

ukweshwa ukushita Amafuta, inshita naipwa. Mwamona? Ibukisheni, ilyo aishile mukushita Amafuta, takwali Amafuta ayashele. Yalya e Malembo. Kabili ena atile, “Tupeniko Amafuta yenu,” ku Lukuta, [Munyina Branham akonkonsha pa cintamba imiku ine—Ka.] Lelo ena ta Yapokelele. Ena limbi kuti atoloka toloka, ukulandila mu ndimi, kabili na fyonse ifyashala, lelo, ukulingana ne Cebo cakwa Lesa Umwine, ena Tayapokelele. Kabili ena ashele mulya mu mfifi; kabilli kwali ukulila, ukuwelesha, no kusumanya ameno, ilyo Nabwinda uwasalwa aingilemo. Na—na cisungu uwa mano alikwete Amafuta mu nyali yakwe.

<sup>9</sup> Nomba, ine—nalishiba naumbi umwaume, icintu cimo ico cacitike fye ubushiku bumbi. Ifyo cena cili, ni aba bantu abasuma, mwamona, ukukwatako apanono, namwishiba ico ndepilibula, ukwikatilila ukunono pakati ka bantu. Kabili icintu cakubalilapo namwishiba, bena balomfwa ukutila ulya ni Lesa ulecita cilya. Kabili inshita ishingira, ulya ni Kasebanya ulecita cilya. Mwamona?

<sup>10</sup> Yesu alikwete ishuko ukwisa ku ntanshi yakwa Herod; Ena alikwete ishuko ku ntanshi ya bengi, kabili bena balefwaya uku Mubomfya ku ca kulangishishako. Mwamona?

Filya e fyonse fye efyo baleesha ukucita kuli Pentecosti. Pentecosti aishile fuma muli filya fintu, ukuba uwaibela. “Kabili nga kapoli mu matipa yakwe, kabili nge mbwa ku malushi ya iko, ukubwelelamo fye nakabili,” kabili nomba mu Kabungwe ka Ecumenical. Mwamona? Cintu cabipa nganshi. Cena camusebanya.

<sup>11</sup> Lesa nsungeni ine uwaicefya kabili uwapetama, pa kutila Ena enga sokolola Icine Cakwe. Mwamona? Nshifwaya ukucita cilya; takuli inyali ishileakisha, kabili takuli ukubengeshima no kubyasha kwe sonde. Lekeneni nsende nshila pamo na basulu abanono bakwa Shikulu. Lekeneni njikale pamo ne Cebo.

<sup>12</sup> Nomba ukulanda pa Kabungwe ka Ecumenical ukwa mpana pamo na Vatican. Bushe mulecetekela ukutila bena kuti ba ampana pamo Cebo? Bena limbi kuti bacita mukabungwe, lelo bena te kuti bacite pa Cebo. Mwamona? Cilya cishinka. E ico tapali nangu cimo icakulanshanishishapo. Mwamona? Akabungwe, cena cimo cine, ifintu fyonse cimo cine; cili icatantikwa bwino bwino, nyina no mwana umwanakashi. Lelo ilyo caisa kuli ici Cebo, ndi fye uwakosa nganshi ukususha ba Methodist na ba Bapsti na ba Presbyterian, nge fyo naba uwa kususha buKatolika, pantu cena ni nyina no mwana mwanakashi, ukulingana ne ci Cebo. Ni ci Cebo ico naimininapo, mwamona, *Ici*, Icebo conse ica Cena.

<sup>13</sup> Nomba, uyu munyina umusuma, ena no mukashi wakwe ba nandi natemwa. Mwe bengi imwe mwalimona muli magazine,

uko ifyo kutila ulya umusuma, munyina uwatumwa na Lesa kuti atala ukulekelela umukashi wakwe... Umo muntu amwebele ukuti amoneke nga Jacqueline Kennedy, kabili abeyele imo iya shilye mbeyo ishikalamba ishikulu ne fintu. Cena ni cinshi? Ena alaampana pamo na bantu ba musango filya, inshita fye yonse, kabili mukulekelesha... .

Umwaume umusuma ukusenda umwanakashi umubi, ena limbi ali no kusanguka umwanakashi atemwa... Ndepilibula, umuntu umusuma ukusenda umwanakashi umubi, ena nalimo ali no kuba umwanakashi umusuma nga te ifyo ena ali no kuba umwaume umubi. Nangisha ibumba lyobe, ndi nokukweba ifyo waba. Mwamona? Ifyuni ifya masako, fipupukila capamo. Talukeniko ku fintu ifya bengeshima!

<sup>14</sup> Nalingile mu mugodi, ubushiku bumbi, palya pa mulu wa mpili mu Arizona no—no mupaka uwa Mexico. Munyina Sothmann na ine, uwikele pano, twali kulya capamo. Kabili nalingile mulya no kwimba umwina uwa finshi... Camoneke fye kwati ni golde. Lelo umusango fye umo mwingeshibilamo ukuti te golde, ilabeka bwino ukucila golde. Ilabeka. Kabili golde taibeka, ilabalika. Mwamona? Kabili ifyo ilya iitwa, ni “golde itumpika.” Yena tayaba iyalinga nge libwe ilyo liba mukati. Yena iletwa icela ica pyrate. Ndetontonkanya, mu fya—fya... Aba science basoso kutila amenshi kabili na acid isuma, ne fintu, tafyatalile ukufika mulya ifingi ukulikosha no kuleta mucifulo ukulipanga ukuba golde. E ico yena—yena ilabeka bwino, lelo tayakwata umuti muli yena.

Kabili ulya e musango ubwingi bwa Bwinakristu ubwakuipashanya bwaba, mwamona, bwena buli no kubeka, kabili nga filya Holy Wood. Lelo Ulukuta lulaka pamo ne Mbila nsuma. Mwamona?

<sup>15</sup> Nomba, umo nkashi pano, Billy acinangisha fye, aciba fye uwalinga ukushita iyi *Life* magazine, ici cikope, no kucikusha, iya cilya caba Malaika cinelubali, kabili no kucibula cena no kucituma kuli ine. Cilya e cikope. Kabili nomba nga kuti mwamona pano, ilyo caleya, ukunina ukubwelelamo, ilyo ba Malaika baletete Imbila yabo, cali mu musango wa pyramid; filya fine fye ifyo na mwebele, imyeshi itatu ilyo tacilacitika, umusango cikabelamo. Bushe co cishinka? [Ulukuta lwatila, “Ameni.”—Ka.]

Kabili Malaika umoneka nganshi, na mapindo Yakwe kunuma uku lubali, kunuma, ukuba kunuma, mulemwibukisha wene. Atile, “Ena akwete umutwe Wakwe... ukwisa mulubilo ulu.” Bushe ta mulemona nangu amapindo *palya*? Kabili kulya kwali ba Malaika *kulya*, filya fine fye umusango calandilwemo.

<sup>16</sup> Nomba, Lesa fye eka ewinga cita cilya. Bena balikwata icikope icili muno, na co, ica mwanakashi uyo wasosele... Inshita ishing, abantu basosa... .

<sup>17</sup> Mu—mukulingulula, ukusosa, “Uyu muntu nakupikilwa ku mfwa, icinshingwa cafita.”

<sup>18</sup> Nomba bena batila, “Cisuma, ena alesosa fye cilya.” Mwamona, balya e bantu abashinga konka fyonse, bena te kuti bamone cilya. Bena kuti babilikisha pamo na imwe, bena kuti—bena kuti balanda na imwe; lelo ilyo caisa mucine ukucetekela fyonse, umweo onse no mubili, bena te kuti bacicite.

E ico, lelo mulemona, nga Lesa ali muli cena, no kulanda Iicine, iyi e nshita ya kulekelesha ye lyashi lya kale. Ino e ya kulekelesha pe lyashi lya kale lye sonde. Cena kwisala. Takwakabe nshita nakabili, ubushiku bumo. Lesa aleshininkisha ifintu fyonse, fyonse fibili ifya bu mupashi ne fya science.

<sup>19</sup> Ilyo nasosele, umulumendo umunono, “Intumba ya Lubuuto, ya moneke nge ntanda.”

<sup>20</sup> Nibanga abaleibukisha, inshita sha kale, baleita Yena “Ulutanda”? Ilyo Wene amonekele uku lubali pa mumana, ilyo Asosele, “Nge fyo Yohane Kabatisha, atumine. . .”

<sup>21</sup> Nomba, mukulekelesha, Cilya calikile, kabili icikope calikopelwe pali Cena. Twalekwata cimo kuno, pa cifulo cimo. Ee, twalesosa ukutila cili palya pa cifutu; nshilecimona. Mu fya science cileshininkisha cilya Cishinka.

<sup>22</sup> Kabili nomba, kabili ukusosa abantu bali “kupikilwe.” Nomba, pano pali umwanakashi, icikope. Cilya icili palya, icaseka, nga filya icikope icili conse; kwati umo ukukopa ici, munshini. Natile. . .Umuntu alesunguka palwa cilya. Kabili natile ku mwanakashi, “Iwe na ukupikilwa ku mfwa, ne mpwalonda. Pali icinshingwa icafita.” Alipilibwike no kukopa icikope. Umwanakashi ali kuno ukupelo bunte, kabili limbi kuti ali muno muno bushiku, pali fyonse ifyo naishiba. Mwamona?

Nomba, *ulya* umwanakashi ne cifimbo icafita pali ena. Cisuma, nomba, cilya palya icishininkisho ica science ukutila cilya cishinka. Kabili lilya line panuma umwanakashi aebelwe ukuba “umutuntulu,” balikopele icikope, kabili tacalipo palya. Ni cinshi icamonekele pa cakumwenako kanshi? Kabili ni cinshi icashele, cilya tacacitile—tacali pa ca kumwenako ilyo calandilwe ukutila ena naundapwa? Mwamona?

Nomba, ukwiminina pano, nali mwebele ukutila ba Malaika baleisa.

<sup>23</sup> Munyina Fred, ukuba umo. . .Nacimona Munyina Fred pakashita akapitapo. Nacitontonkanya ali fye kuno kwine, lelo ni mulufya pamo. Owe, kunuma kuno, cilya cishinka. Ena aliminine mukati ka—ka ba mailoshi babili, atemwa mailoshi na citika, atemwa ba mailoshi babili, ukufuma apo nali; alyumfwile ukupoleka, uku kumya ilibwe, na fyonse ifyashala, ilyo lyafuminepo. Cilya cishinka, Munyina Fred?

Kabili kulya kwali ba Malaika abo abatuminwe ukubwela na shilye Mbila. Kabili ici cili pano na mu musango uwa pyramid, nge fyo na mulangishe ifyo cali no kuba muno, nalimwebele ifyo bakeminina, ilyo nshilaya.

Icikope panuma ya cikope, ukuciluka icalo, bali cikopele, ukuya fika mu Mexico, ukuba ba mailoshi amakumi yatatu mukusansama kabili ba mailoshi ama kumi yabili na cinelubali ukucilinganya cena. Kabili cali pa mulu nganshi ica kutila nangula umutonshi atemwa nangula icintu cimo teti... Umutonshi tawenda ukucila nalimo bamailoshi cinekonse konse atemwa pabula, ukusansama, kanshi bena bali pa cifulo uko kushaba nangu cimo icingapanga umutonshi. Mwamona? Kabili ici cali, ndetontonkanya cena cali limbi ba mailoshi ama kumi yabili ukusansama kabili ba mailoshi amakumi yatatu ukucilinganya, atemwa limbi cena cali—cena cali amakumi yabili... atemwa ba mailoshi amakumi yatatu ukusansama kabili ba mailoshi amakumi yabili ukucilinganya cena, cimo atemwa icibiye. *Life* magazine yalicyibikilemo, atemwa *Look!* Cali ni cinshi, *Look* atemwa *Life? Life, Life* magazine. Ndetontonkanya, May 17, ilya fumine. Cilya eco.

<sup>24</sup> Nomba cilya icili palya, mufya science, ukushininkisha ukutula cena Cine, e ico kanshi ifwe—ifwe tatusakamana nga cakutula cena Cine; muli fyonse ifya science, ne fya bu mupashi, kabili cilya icalandilwe caishile fikilishiwa. E ico, Mbila iya Fikakatikilo Cinelubali, mu kwisala kwa shena, ilya e Mbila iya Baibele yonse. Ifikakatikilo Cinelubali filesala Icipingo Cipyu no kucikakatika. Cilya cishinka. Nomba, twalishiba ukutula cilya cili, ku cebo ca busesemo, kufya science, kabili na ku Cebo. Fitatu nafipela ubunte kuli cena, ukutula cena Cine.

<sup>25</sup> E ico kanshi, twalishiba ukutula tuli ku nshita ya mpela. Tuli pano. Nshishibe kufika lilali, ine—ine... Wene takatale ukutulenga ifwe ukwishiba cilya, pantu Ukwisa Kwakwe kukaba “ngo mpupu mu bushiku.” Mwe banandi, munyinane, nkashi, lekeni fye tube abaiteyanya, te mulandu ifyo cili. Lekeni tuisangulule fye fwebene. Mwamona? Pantu, isonde likatwalilila. Bena tabakatale no kwishiba ukutula calicitike. Ilyo iminshi ya luse yaisalwa, naba kashimikila bakalashimikila ipusukilo, uku—ukulenga abantu ukulapila, ukuya fye nga filya caleba lyonse. Calicitike mu nshita shimbi, kabili calicitike mu... Cikesaba muli ino nshita.

Kabili Ukusendwa kukaba ukwa kupumikisha nganshi kabili ukwangufyanya nganshi, ica kutila isonde talyakatale no kubalufya, ukutula bena na baya. Cisuma. Bena tabakeshibe nangu cimo palwa cena. Akesa no kufyusha Wene. Lwena lukaya, bena tabakeshibepo nangu cimo palwa cena.

E ico, beni mwi pepo. Mulempepelako. Na ine ndi no kumupepelako. Tatwishibe ilyo ilya ora ikaba, lelo tulecetekela cili no kuba ili line. Talukeniko ku fintu ifya bengeshima. Ikaleni ne Mbila nsuma, mwamona, apo pene nomba, no kupepa.

<sup>26</sup> Nomba, Billy na nembela inkalata pano, atemwa akakalata ntile, kabili acisosa ukuti umo umuntu alefwaya ukushisha akanya. Nga cilya cishinka, (bushe efyo?) Imyeni ukuboko kwenu, nga umo. . . Ee, utunya tubili. Cili fye bwino, baleteni ino ine nshita. Kabili Munyina Neville. . . Kabili ndesunguka nga nkashi yesu pa piano kuti aisa kuno muka shita fye, ku kushisha akanya. Tatulefwaya ukushapo nangu kamo.

<sup>27</sup> Nomba, ibukisheni, pali ino nshita mailo mu bushiku, Shikulu nga suminisha, nkaba mu Musumba wa New York. Kabili tukaya kulya ku ncende ya bulwi, ku “ukulwa ubulwi ubusuma ubwa Citetekelo.”

<sup>28</sup> E ico pano pene fye, nkashi, nga kuti wacita. Pano pene ku ntanshi, kabili na labemya. Ee, mayo. Natotela. Kabili nomba ifwe tuli. . .

<sup>29</sup> Nibanga abali no kumpepelako? [Ulukuta Iwatila, “Ameni.”—Ka.] Nomba, nga Lesa asuminisha; icili, ndesubila Nacita; pa Mulungu, umulungu. . . Nga cili fye bwino na Munyina Neville. [Munyina Neville atila, “Cili fye bwino.”] Pa Mulungu, umulungu, nkabwela nakabili, pa bulendo bwandi ukuya ku Louisiana, no kwiminina pa kashita ku kulongana pano pa chalichi. [“Ameni.”]

<sup>30</sup> Ndefwaya ukumutotela imwe bonse pa cikuku cenu. Ulya na mayo uwa ntumine ulya sweet kulya lubali ine—ndetasha cilya. Nshishibe na mayo nani. Umuntu umo alintumina akabokoshi ka ma sweet na tumo utunono utwa kusheta nga filya. Fyena fyali mucine cine, mucine cine ifisuma. Ninjikuta pali fyena ino ine nshita, kabili ine—nde mutotela. Kabili muletonkanya filye fintu ifinono tafipilibula ifingi? Mucine filacita; utwabupe utunono. Kabili abapusana pusana ukupela ifya bupe fyabo ifinono ifya citemwiko. Kabili ukulangisha Billy Paul, no kubapela, ne fintu. Ine—ndapokelela, mwamona. Imwe tamwaishiba umusango ntotela pali cena! Lesa amupale. Ndi nokucibukisha, mwamona, cipulemo ifyo Wene e bukisha cena. “Ilyo lyonse mwacitila aba abacepesha Bandi, mwacitila kuli Ine.” Mwamona? Nomba, uluse lukalangishiwa ilyo luse lwapelwa.

<sup>31</sup> Nomba, na tukwata bamo abasuma abantu abanono kuno. Bushe imwe. . . Ndefwaya imwe ukwikala uko nokwimba *Baleteni Mukati*, panuma. Cisuma, imwe ba munyina iseni fye kuno pali miniti.

Mwe, uyu pano umupya, utumenso tubili utunono utwakashikila ukulolekesha pali ine, noku kalamba,

ukumwentula ukusuma. Umukashana umunono, nani ilyakwe... [Banyina batila, "Sharon Rose. Sharon Rose."] Sharon Rose, lilya lishina ilikalamba kuli ine. ["Twalimwinike, Munyina Branham, ukupashanya uobe."] Ukupalana no mukashana wandi umunono uyo uwatangilako. ["Twalimwinike ilyo talati afyalwe, Munyina Branham."] Ba mwinike ilyo talafyalwa. Nga cali no kuba aka mukashana akanono, imwe nga mwalikenike Sharon Rose. ["Ifwe twali abashininkisha ena ali no kuba umukashana. Ena, alingile."] Alingile. ["Sharon Rose Goodman."]

Namwishiba ici? Nshishibe nga cakutila mwalicishiba atemwa iyo; ngo mukashi wandi aciminina pano, ena nalimo nga cibafye mupepi no ku nenuka. Ili lilaya lya musango umo wine ilyo akamwana kandi akanono aka mukashana kakwete pa kushishiwa, umunono Sharon Rose. Ili limo limbi... lekeni uyu abe no mweo; kwisa, Lesa asendele uwandi ku mulu.

Ni wani ishina lyobe ilya kulekelesha? [Nyina atila, "Goodman."] Mrs. kabili... Bushe iwe ufumine muno mumusumba? ["Chicago."] Chicago. Munyina na Nkashi Goodman, Lesa amupale.

Namwishiba, Sharon wandi umunono alemoneka filya fine. Nshiletunganya kuliko umuntu umo muno uyo umwibukisha umusango alemonekelamo. Ena alikwete uutumenso utunono utwakashikila nga filya, kwati ni ba nyina, umukashana umunono umusuma nganshi ne mishishi iya fita. Kwati fye...

Kali ne myeshi inga akanya? [Ba nyina batila, "Imyeshi isano."—Ka.] Imyeshi isano. Ena ali ne myeshi cinekonse konse ilyo Lesa amwitile ku mulu. Nali mumwene, panono panuma ya cilya. Imwe mwalishiba ilyashi. ["Twali likwata ku nga'nda, pali tepu."] Mwalili kwata ku nga'nda, pali tepu.

Sharon Rose yafuma mu Cebo. Nalilipilibwile, ukufuma, "Rose wa Sharon." Kabili Ena alekabila umwana, pali bena, pa cipailo Cakwe, e ico Ena ali musenda. Ena Mwamona? Kabili nkaba pamo nankwe nakabili. Leka Sharon obe akabe no mweo ku kufikilisha ubumi ubo alingile ukwikala pano pe sonde. Kabili lekeni ena abe na imwe mu Bukata, nge fyo ndeumfwa ifyo Sharon wandi akaba pamo na ine.

Uli shani? Mwamona? Mulelanda pa kantu akanono akaba bwino, lolekesheni pali aka! Ena alemwentula fye.

Natukontamike imitwe yesu.

Mwe Lesa, nge fyo njikatilile aka kacuma akanono, umunono Sharon Rose. Mwalishiba mu mutima wandi Shikulu, ifyo ndetontokanya, e ico nshilingile ukucilangisha. Abe uwapalwa Shikulu Lesa Uyo upela ifi fisamo ifinono ku mitima yesu! Paleni iyi nga'nda yakwa Goodman. Lekenin aba fyashi bakacindikwe, ifyo bena bali, pa kukwata icisamo mu



nga'nda. Leken i ekale mu nga'nda yabo, Shikulu. Kabili nga kukaba ulwa mailo, muka mulenge ukuba umwanakashi uwa cindama, pali mailo.

Kabili nomba, Shikulu Lesa, mukunakila ku fyo Imwe mwatupela umulimo, ku cilangililo Cenu, ukucita, Imwe mwalisendele abana banono mu ma boko Yenu no kubapala, kabili mwatile, “Leken i abana banono bese kuli Ine.” Kabili bena baleta umwana kuli ine, pa kuba umu bomfi Wenu, ngefyo Imwe mwasosa aba bomfi Benu ukutwalilila no mulimo Wenu. Kabili pano na peminina aba bomfi Benu, Munyina Neville, na Munyina Caps, na ine wine. Kabili nomba, Shikulu Lesa, ukufuma muminwe yakwa wishi na nyina, tulepela kuli Imwe umunono Sharon Rose Goodman, uo tuleshisha ku bumi bwa mulimo, mwi Shina lyakwa Yesu Kristu. Amen i.

Lesa akupale! [Nkashi Goodman atila, ‘Munyina Branham, natukwata na bambi basano, ku nga'nda, abakashana babili na balumendo babili.’—Ka.] Abana banono basano, kunse ya uyu! [“Ee.”] Ifyo cawama! Lesa akupale, Munyina Goodman. Lesa akupale, Nkashi Goodman. Kabili leken i Shikulu apale umunono Sharon!

Uli shani, munyina? Nomba leken i tumone, ine—ine. . . Arnett. [Ba wishi batila, “Arnett.”] Arnett. Arnett, cilya cishinka. [“Ukwini kwa ukupashanya—ukwini kwa ukupashanya ilyobe.”] Bushe co cishinka? William, William Arnett? [“James William Arnett.”] James William Arnett. Uyu mulumendo musuma. Mwalishiba, ifintu fimo ifyo twakwata bonse, ena na ine, kale; amashina, elyo kabili tulasakula imishishi ukupalana, mulemona. Ena mulumendo umusuma, Jimmy. Ndemona filya efyo mu mwita, James? [“James.”] James, kanshi, cili fye bwino.

Ndesunguka nga kuti na mwikatilila? [“Ena limbi kuti aleka iwe.”] Nshishibe. Nomba, Jimmy, cisuma, tuli ifibusa ifine fine. Nawishiba ici, bushe tawishibe? Cisuma.

Natukontamike imitwe yesu.

Shikulu Lesa, Imwe na mupala ino inga'nda, inga'nda yakwa Arnett no uyu mulumendo umunono umusuma. Kabili ndepepa ukutila Imwe muli no kupala ba wishi, ba nyina, abatemwikwa bakwe. Bena Benakristu. Ifyo kutila bawishi balwishishe na maka nganshi, balya bafwaka ne fintu ifya pusana pusana, ukufuma. . . Ubushiku bumo calishile, “EFYO ASOSA SHIKULU.” Ena ali ngo mwanakashi ulya uwali uwa mukoselela ukutila ena ali no kufika kulya. Nangula amakwebo yakwe yalifililwe, kabili ifintu fyonse fya moneke ukufilwa, ena nalyoline asendele icipututwa ca ndalama shakwe no kulolela ukulanshanya panuma ya kulanshanya, mpaka ulucelo lumo calicitike. Alicetekele ukutila kuti cacitwa.

Nomba aleleta uyu mulumendo umunono uo Imwe mwamupalilako, Mwe Lesa, icisabo ica kwampana kwabo. Ndepala uyu umunono James William Arnett, mwi Shina lyakwa Yesu Kristu. Mupeni ubumi ubutali. Mulengeni ukuba umuntu uwalinga uwa Mbila nsuma Yenu ku lwa mailo, nga kukaba mailo. Kabili, mukulekelesha, mu Bufumu ubo ubuleisa, lekeni tukabe kulya capamo. Ine. . . Nga ba bomfi Benu, tulebika indupi shesu pali ena no kushisha ena kuli Yesu Kristu, kuli ubu bumi ubwa mulimo. Amenii.

Lesu akupale. Lesu akupale, munyina. Natukwata babili na bambi? Aba ni bamo bene. Cisuma.

Ndecetekela iwe kuti waba fye mupepi no kunjimya, mu cifulo ica ine ukukwimya. Kabili uyu ni. . . [Munyina Arnett atila, “. . . ? . . .”—Ka.] Alfred, kabili Al na Martha. Lekenii fye ulukuta, nalitemwa bena ukumona abana. Ndetontonkanya, ilyo bena bali abanono, abaice, bena balitemwikwa.

Nomba lekenii tubike indupi shesu pali bena.

Kabili ifi fine, Lesu Impalume, ifwe fwe ba bomfi Benu, twabika indupi shesu pali aba bana, munyina umunono na nkashi uwa uyu mulumendo umunono uwa shishiwa fye kuno. Twabika indupi shesu pali bena pa ku—kushishiwa, ukufuma kuli ba nyina na bawishi, ku maboko yakwa Yesu Kristu, ku bumi bwa mulimo, mwi Shina lya kwa Yesu Kristu. Amenii.

Lesu amupale. Al na Martha, nkashi, cisuma nganshi uku kumona nakabili. Lesu abe na iwe.

Uyu muntu umunono, mwe, ena mulumendo umusuma. Nalesakula imishishi shandi nga filya. Mwamona? Ishina lyakwe ni nani? [Ba wishii batila, “Terrell Keith Walker.”—Ka.]

Kei- . . . [“ Terrell Keith Walker.”] Herrell Keith Walker. Ifyo alii umulumendo umusuma!

Ndesunguka, nshishibe fye, mwamona. Ena alelekesha kuli ine kwati fye limbi kuti. Ndesunguka nga kutii namwikata? [Umwana alanda—Ka.] Bushe cilya cili fye bwino, Keith? Owe, ena mulumendo umusuma. Mucine. Bushe uyu te mulumendo umusuma uwa temwikwa? Herrell. [Ba nyina batila, “Terrell.”] Herrell, Herrell Keith Walker.

Mwe Lesu Impalume, ukufuma ku maboko ya bafyashi ukuya mu maboko yakwa Yesu Kristu, umunono Terrell Keith Walker, tulebika indupi shesu pali ena mu kushishiwa kuli Lesu Impalume. Nge fyo bawishi na ba nyina balekabila ukutila uyu mwana aka kushiwe no kufundwa kwa kwa Lesu. Nga kukabako mailo, mukamulenge ukuba umubomfi uwalinga uwa uku kushishiwa, pantu ifwe fwe ba bomfi Benu tulebika indupi shesu pali uyu mwana no ku mushishisha kuli Shikulu Yesu Kristu. Amenii.

Akupale, Munyina Walker. Bushe uyu ni Nkashi Walker? [Nkashi Walker atila, “Ee, mukwai.”—Ka.] Ena musuma nganshi. Mwalikwata umulumendo umusuma, kabili lekeni Lesa amupale.

[Munyina Gramby alanda kuli Munyina Branham—Ka.] Cisuma, mukwai. [Munyina Gramby atwalilila ukulanda.] Ee. [“Kabili ali mupepele ilyo afyelwe. Alifyelwe na cimumena mu mubango wakwe. Kabili iwe wali mupepele. Kabili cilya califumine lilya line.”] Uyu mukashana umunono, ni Munyina Grimsley uwesu... [Munyina atila, “Gramby.”] Gramby. Ine—ndekwata cilya ukusankanishiwa. Ninkwata Munyina Grimsley, natwalilile fye ukutontokanyapo... Munyina Gramby aleleta uyu mukashana umunono. Kabili ilyo afyelwe, alikwete cimumena icikulu mu cinso cakwe. Kabili nali mupepele, kabili cimumena califuminepo. Kabili nomba balefwaya ukupepa, pantu... Bushe abafyashi Benakristu? [“Te Benakristu.”] Bena te Benakristu. Kabili bena bali no mwenso ukutila umupashi uwakowela ulesenda umwana, kabili balefwaya wene utamfiwe.

Natupepe.

Shikulu Yesu, pali uyu mwana umunono, ilyo ashintilila ku cipailo... Icili, Imwe na mulangisha inkumbu, kukufumya cimumena icafimba mukanwa kakwe. Nomba umupashi uwakowela uleesha ukusenda ubumi bwa mwana. Ukwabula ukutwishika lelo ifyo Imwe mwingabomfya uyu mukashana, kabili no kupanga ukucicita, kabili Satana aleesha ukufulunganya ubutantiko. E ico kanshi, tuleeba Satana, mwi Shina lyakwa Yesu Kristu, ku kufumya ayakwe—amaboko yakwe no mwine ukutaluka ukufuma kuli uyu mwana; ilyo tulemupela kuli Shikulu Yesu Kristu, ku bukata bwakwa Lesa. Ameni.

Munyina Gramby, ulecetekela. Umwana acepesha nganshi ukukwata icitetekelo cimo, lelo cili no kuba.

<sup>32</sup> Nali Mutemwa. Bushe tamucita? [Ulukuta lwatila, “Ameni.”—Ka.] Ena aliwama.

Nomba, cila muntu, nacilaya muno bushiku ukutila nalafuma mu ma eight sate, eico cilya cilempela citika wa ora. Nshishibe nomba palwa cilya. Ine limbi kuti na bafye uwa celwako panono ukucila cilya. Lelo lekeni ifwe nomba . . .

<sup>33</sup> Ndi uwa nsansa ukumona Munyina Dauch muno luno lucelo. Kabili nshishibe uko umwaume umbi aile; lelo muno lucelo, ngali tala ukukwata uwa cibili, kwaciba umwaume u wacikala kunuma fye kulya, aciba fye uwa palana nganshi kuli ena. Nacisosa, “Ninani uli Munyina Dauch?” Nacilolekesha uku no ku, kabili naciba no kucinika; kabili nacisendwa nganshi mu Mbila. Nawishiba, Munyina Dauch, ulemoneka fye nga filya fine walecita lyonse. Ndi uwa nsansa nganshi ukumumona muli ilye mibebe.

<sup>34</sup> Nomba line fye, nalikwete lyamya iya kufuma ukutali ukufuma ku Tucson, ukumupepelako nakabili, ukutila icintu cimbi calicitike kuli ena. Munyina Dauch aba, ndetontonkanya, amakumi pabula atemwa nalimo amakumi pabula na cimo. Ali ne myaka ya kufyalwa amakumi pabula, ndecetekela, atemwa ama kumi pabula na cimo. Kabili umubili wenu ulapwa maka. Lelo, “Fingi ifibi ifiponena uwalungama, lelo Lesa ala mupokolola kuli fyonse.” Kabili inshita shimo, iyo mubili waisa fika kucifulo uko mubili teti wikatane nakabili capamo, ni njishiba ena naikatilila ku Kuboko. Nangula iloba lya lukungu, Lesa alilaya ukulibusha nakabili, mu nshiku sha kulekelesha. Kabili ndetasha nganshi.

<sup>35</sup> Ndeibukisha Munyina Dauch, iyo aishile mucishiba muno ku kubatishiwa mwi Shina lyakwa Yesu Kristu, kabili ena takwete nangu ifya kufwala muno ku kubatishiwamo, lelo alefwaya ukuya nangu cibe fyo. Kabili Lesa abo wa nkumbu nganshi kuli ulyo muntu. Tontonkanyeni fye, ena ali imyaka amakumi yabili ukucila inshita iyo Lesa amulaya. Mwamona? Nga cilya te nkumbu!

Kabili nalyo line ukulala, ubushiku bumbi, no kufilwa kwa mutima ukwapwililika, kabili ukwikatwa kwa mutima, mwamona, pa mulu wa cilya. Kabili nga Lesa taundepe ulyo mwaume no kumuleta ukufuma kulya, apopene fye. Kabili ndecetekela, ukutula lilya, shinga’nga wakwe alifwa. Bushe co cishinka? Ndeu-...Ee, icakutila nangula shinga’nga, shinga’nga uwa ci Yuda uyo—uyo uwale mubombela, ne fintu, kabili aliminine mucikulwa no kulanda kuli ine palwa ena, ena alitangilako. Mwamona?

Mwe, ifyo cacila, ifyo cashika icitemwiko Cenu, Mwe Shikulu! Ifyo caba icikalamba icitemwiko Cenu!

<sup>36</sup> Nomba, natukwata ututambala tumo uto twalapepelwapo, mu nshita fye inono. Lelo nalalanda kuli imwe panono pa citetekelo, elyo kabili twalamona ifyo Shikulu alantungulula, ifyo twalacita ukufuma nomba ukuya pantanshi. Cisuma, lekeni tulekele fye Cena kuli Wene, ulya e musango usuma. Owe, ukwikala capamo mu ncende sha mu Myulu!

<sup>37</sup> Nacilanda kuli bamo abanandi, ilelo, panuma iyo na cifuma mu Blue Boar kulya lubali. Kabili nacisosa, “Bushe mwalabako mukulongana?”

<sup>38</sup> “Ee.”

<sup>39</sup> Natile, “Imwe nalimo mwalaensha mpaka twelufu atemwa wanu koloko.” Bena balesubila ukufika ku nga’nda muli ba six mu lucelo, bulendo ubutali nganshi. Ibukisheni, bena bantu, kabili balanaka kwati fye ni ne. Ukuya kulya mu Tennessee, kabili ukushinguluka, uko baleya. Shikulu abapale.

<sup>40</sup> Kuliko ifintu ifingi nganshi ifyo ningasosa; nalasenda fye inshita yonse. Lelo ine—nshikwata ukumimona ilingi line, kabili ine—ine—nalitemwa fye ukulanda kuli imwe, nangu cibe fyo. Lelo nga nshilekwata ukumyeba fyonse ifyo ntontonkanya palwa imwe, muno, . . . Mwamona?

Ndefwaya ukubeba ba munyina. Bamo muli bena na basalanganya inkuta shabo.

<sup>41</sup> Munyina Jackson, muno mulucelo, acipela bulyo bwilulo ubwawama ubwa i—ubwa ululimi ulushaishibikwa ulo umo munyina acilandilamo, no kushininkisha atemwa ukulangisha ukutila Caciba ni Lesa. Bushe mwacimona, Ena tacisosa ukuti Cena tacali icalubana, Ena tacisosa ukuti Cena tacaciba ifyo; Ena acipela fye ukusoka ku kumfwa. Mwamona? Mwamona? E ico, Munyina Junior aciba muno mulucelo, kabili acisalanganya ulukuta lwakwe.

Kabili ndeiluka ukutula bamo ba munyina ukufuma kulya. . . Inkuta shimbi, ukufuma kuno ku Sellersburg.

<sup>42</sup> Kabili—kabili Munyina Ruddlle, aciba muno mu lucelo. Nshishibe nga bena bali muno muno bushiku atemwa iyo. Cisuma, muno nakabili mu bushiku! Cisuma, Shikulu akupale, Munyina Ruddell. Kabili iwe. . .

Ine tekuti nčilangishe fye, ico ndetontonkanya. Lelo nalimo. . . Cisuma, ilyo tukesaya ku lubali lumbi, ndefwaya nkekale panshi pamo na iwe pa myaka fye amakumi ikana, iciputulwa, mulemona. Elyo, mwamona, tukalanda fyonse.

<sup>43</sup> Kabili ilyo ukuslobolola nakufikapo, kabili aba bomfi banono, lekeni twingile mukati ka wena, kwi shuko kuti kwabako umubembu uwikele muno. Kuti kwabako umo muntu uyo muno bushiku limbi kuti apilibula imyendele yonse.

Kabili nga tayaciba inshita, mu lucelo, muno bushiku limbi kuti kwaba ukwisala Amabuku. Ibukisheni, takwakabe nangu umo na umbi ukengilamo ilyo yalya mashina ya lubulwa.

Lintu, nomba, cila muntu umfwikisheni nganshi lintu nshilabelenga Amalembo.

<sup>44</sup> Bonse abo abatalile ukulubulwa, Lesa abikile amashina yabo mwi Buku ilya Mwana wa mpaanga ilya Mweo ilyo isonde talilati lilengwe. Ni banga abaishiba cilya? Yalya Malembo. Kabili umupashi wa munkanyakristu, mu nshiku sha kulekelesha, ukaba uwapalama nganshi nge cintu icituntulu, Ulukuta ulwa cine, ifintu fyonse kwati fye ni filya Yuda ali, mpaka cikabepa na Basalwa bene nga cabe cinga citwa. Bushe co cishinka? Lelo takuli umuntu uwingesa kuli Yesu kano fye Lesa amutuma, kabili bonse abo Lesa apele kuli Wene bakesa kuli Wene. Kabili ilyo Ena asenda lilye Buku, ishina lya kulekelesha. . .

<sup>45</sup> Mwamona, bonse mu nshita ya Lutheran, Ena alibafumishemo. Bonse mu nshita yakwa Wesley, Ena ali

bafumishemo. Bonse mu nshita isha pusana pusana, kabili inshita ya Pentecosti, Ena alibafumishemo. Bena bali kulubali lwa kuno, tabakapingulwe pamo na bo. Bena balessendwa. Elyo kabili ilyo ishina lya kulekelesha likafumamo, lilya ilyabikilwe pe Buku ilya Mwana wa mpanga ilya Mweo, uyo waipaiwe ilyo mufula wesonde taulalengwa; ilyo lilye shina lyakulekelesha lya lubulwa, umulimo Wakwe ni nshi wapwa, Ena akesa kukupoka ifyo Ena alubula. Cilya cilelenga imitima yesu ukukontoka. Lelo nga calitwalilile imyaka ikana pa ntanshi, teti kube nangu umo ukulubulwa.

Kabili takuli nangu umo uwingalubulwa kano fye balibikilwe pe Buku ilya Mwana wa mpaanga ilya Mweo ilyo mufula we sonde taulalengwa. Bena ni bani? Nshishibe. Tapali nangu umbi uwaishiba, mwamona, Lesa fye eka. Ndeceteka ukutila cila umo muli ifwe, amashina yesu yali pali lilye Buku. Nge lyandi lya li pali lilya, ndi uwashininkisha ukuba kulya; nga talyali, nshakabeko kulya. Epela fye. Mwamona, fye, cilya cili fye kuli Lesa. “Te uyo ufwaya, uyo ubutuka, lelo Lesa ulangisha uluse.” Mwamona?

<sup>46</sup> Nomba lekeni nomba tupalame Icebo, nakatina konse no bufumacumi. Kabili ndetontonkanya cilya cintu cimo ico tulingile ukucita, mwamona. Lekenituleke ifya buwelewele ifingi! Beni no mucinshi, ubufumacumi!

Nalimona kulyo kuyebelala inshita shimo ilyo bena... Pali television, ilyo bakwete kulyo kulongana kwa kwa Billy Graham; takuli nangu cimo ica kususha Billy Graham. Lelo kunse kulya mu California, umwaume ashimikile Imbila iyawama ilya nshita ya bushiku ubwa kulekelesha; ashimikile icintu cimo cine ico nashimikile kuno te kale sana, pali Daniele, “Na mulingwa mu cakulingo kufina no kusango wa bulila.” Ni banga abamwene cilya? Mwebengi imwe, ndemona.

<sup>47</sup> Lolekesheni, bushe mwalimwene balya bantu ukwisa ukufuma umwa kupita, ukusheta ifya kusheta, baleseka, ukumana umo no mubiye? Cilya tekwenda pakati ka mfwa no Mweo. Filya te kuyebelala pa lubembu, no kulapila, mwamona? Cilya cili fye ifyo Billy asosele, “Ukukwata ukusala.” Kabili ilyatalala, ukulapa ukwa linso ilya bula icilamba, ukusala, takwaba nangu cimo, te cintu nangu cimo. Ulingile ukumfwa ubulanda pa lubembu, no kupilibuka ukufuma kuli lwena.

Kabili Billy umwine atile, “Cishininkisho kutila, ukufuma ku makana ama kumi yatatu, iwe te kuti usange ama kumi yatatu mu mwaka.” Atile, ubushiku bumbi, “Bwafyanshi na New York? Nalikwete kulyo kulongana ukukalamba kulya, kabili cinshi ica citike? Ulubembu luli ulwabipisha nomba ukucila lyonse.”

<sup>48</sup> Kabili lukatwalilila ukubipisha. Takwakabe nangu uku-...ukulapila ukwa nko. Inko yalipwa. Ni mwefye, cila

muntu; kabili ili line cilya cili no kupwa, nga tacitile kale. Nomba, imwe mulembe fye cilya, imwe mwe bana abanono. Mwamona kufika lilali Munyina Branham . . . Tacili Munyina Branham. Cilya eco nasosa cili icalungama atemwa icilubo. Ulubembu lukabipisha no kubipisha mpaka ubushiku bumo imyulu ikambuka umulilo, ukaponena pe sonde, kabili isonde likapya ne cikabilila. Lelo, Abalubulwa tabakabe pano lilya, bena bakaya.

<sup>49</sup> Nomba mwi Buku lyakwa Marko Washila icipandwa ca 11, Yohane Wantanishi 4:4 kabili muli Mateo 28:20, ndefwaya ukubelenga.

<sup>50</sup> Nomba, icakubalilapo, ndefwaya ukubelenga ukufuma muli Mateo Washila, icipandwa ca 11, kabili na vesi ya 12 ukushinta iya 24.

Umfwikisheni nganshi nomba ilyo tulebelenga. Kabili nomba ici calashininkisha ku bunte ubunono, ne fyebo ifinono ifya kukoselesha, elyo kabili twalamona ifyo Shikulu alatukwatila ifwe ukucita. Cila muntu ekale ifyo fine kabili beni mu mapepo nomba, ilyo tulebelenga.

<sup>51</sup> Marko 11:12.

*Kabili ulucelo, ilyo bena . . . baishile balefuma ku Betani, aiketwe nsala:*

*Na pakumona umukunyu ukutali uli na mabula, aileko, nga engasangamo akantu: kabili pa kuyako, tasangilemo kantu kano fye amabula; pantu tayali ni nshita ya makunyu.*

*Elyo awebele ati, E bwekeshapo umuntu nangu umo ukulyako ifisabo kuli iwe. Na basambi bakwe balyumfwile.*

*Kabili bafika ku Yerusalemu: na Yesu pa kwingila mwi tempile, atendeke ukutamfyamo abaleshisha na baleshita mwi tempile, na ma tebulo ya bakakabula bandalama, ne fipuna fya baleshisha inkunda;*

*Kabili talekele muntu apite ne cipe ukupita mwi tempile.*

*Kabili alasambilisha, no kutila kuli bene, Bushe ta . . . tacalembwa, Inga'nda Yandi iketwa i . . . inga'nda ya kupepelamo ku nko shonse? na imwe mwaisangula ininga ya fipondo.*

*Na bashimapepo bakalamba na bakalemba balyumfwile, balefwaya no mwakumonawila: pantu bena—balemutina, ico ibumba lyonse lyapapile isambilisho lyakwe.*

*Kabili calati cabe cungulo, alafumina kunse ya musumba.*

*Kabili ulucelo celo, (nomba bulya bushiku bumbi,) pa kupitapo, ba mona umukunyu nauma ukufuma ku mishila.*

Mukati ka ma ora amakumi yabilli na fine, icipesha mano calicitike, panuma ilyo Asosele kuli cena, “Takuli umuntu ukulyako.” Nangu cimo, camoneke, ukucitika lilya; lelo, ku bushiku ubwa konkelepo, cena calyumine.

*Na Petro pakwibukisha atile kuli wene, Rabbi, moneni, umukunyu uo mwapitile nauma.*

*. . .na Yesu ali mwaswike, atile kuli bena, Mube ne citetekelo muli Lesa.*

*Ndemweba icacine nati, Ukuti uyo onse ukasosa kuli ulu lupili ati, Sendwa, ukuposwa muli bemba; kabili tatwishike mu mutima wakwe, lelo atetekelo kuti ico asosa cikaba; cikamucitilwa conse ico asosa.*

*E ico ndetila kuli imwe, Fyonse fintu ifyo mulekabila, ilyo mwapepa, tetekeleni ukuti na mupoka fyena, kabili fikaba kuli imwe.*

*Kabili ilyo mwaiminina mulepepa, nga muli na kantu pali umo: mulekeleleni, ku kuleka na Shinwe wa mu mulu alekelelwe ama mpulu yenu.*

*Lelo imwe nga mwakana ukulekelela, na Shinwe uwa mu mulu takalekelele ifya kupuluka fyenu. (Cili ne fyakucitapo).*

52 Nomba kuti na temwa ukubelenga Yohane Wantanshi 4:4.

*Imwe muli bakwa Lesa, mwe twana twandi, kabili mwacimfya aba be fi: ico . . . (umfwikisheni) . . . uuli muli imwe acila, uyo uuli mwi sonde.*

53 Leken i mbelenge nakabili nomba.

*Imwe muli bakwa Lesa, mwe twana twandi, kabili mwacimfya aba be fi: (ukulanda pali munkanyakristu), ico uyo uuli muli imwe acila, uyo uuli mwi sonde.*

Imilumbwile ya fibili, mwamona, “uyo,” ukulumbula kwa umo; “uyo” uuli mwi sonde, kabili “Uyo” uuli muli imwe. “Uyo uuli muli imwe acila uyo uli mwi sonde.”

54 Nomba, kabili i—icipandwa ca 28 ca Mateo Washila, na vesi ya 20.

*Mulebasambilisha ukubaka fyonse ifyo na mwebele: . . . moneni, ine na kulaba na imwe lyonse, ukufika pa kupwa kwe sonde.*

55 Nomba isambililo ukufuma kuli yalya, muno bushiku, ndefwaya ukubomfya ici ngesambililo: *Uyo Uuli Muli Imwe*. Kabili pali ici ndefwaya ukukula icitetekelo, mucine, kukulongana kwa mapepo. Kabili bwangu fye nge fyo . . .



<sup>56</sup> Nomba, e fyo cili nge fyo mwebele, nalitemwa ukumutwala ku fintu ifyo fyacitika. Kabili ine ilingi line ndalolela mpaka naisa ku—ku chalichi kuno ku kusosa ifyacitike. Elyo kabili nga bambi balefwaya ukumfwako cena, kuti bacumfwa ukupiitila pa matepu. Lelo ndalolela mpaka ndi muno.

Kabili kuliko, nalimo, kuli ici cacitike ico nalamwebapo ino ine nshita, kuliko abaume abengi muno abali ni nte ya ifi, ba munyina Abenakristu. Umo uwaliko, ni Munyina Banks Woods. Umbi uyo walipo, ni Munyina David Woods. Umbi, uyo uli muno, ni Munyina Evans no mwana wakwe umwaume, Ronald. Umbi uyo walipo, ni dikoni wesu uwacindama, Munyina Wheeler. Kabili umbi, uwalipo, ni Munyina Mann. Bushe Munyina Mann ali muno, ukufuma ku New Alburny? Kashimikila wa ku Methodist uo na batishe mwi Shina lyakwa Yesu Kristu, ili linefye, eko ali kulya, nao, ilyo ici cacitike.

<sup>57</sup> Caba ni pa nshita imo, pa myaka inono, iyo nakwete icisendo icashika mucifuba candi ukutila ine...mu mutima wandi. Caumfwike kuli ine ukutila kwati nalicitile icintu cimo icalubana. Kabili nalifwailishe ubumi bwandi, lyonse lyonse kabili lyonse, ukumona ico cali icalubana. “Shikulu, nga—nga nalicita icintu icili conse icalubana, lyena Imwe cisokololeni fye kuli ine, ico cili icilubo, kabili ndi no kuya no kucilungamika.” Lelo takuli nangu cimo icasokololwelwe kuli ine. Kutu nasosa, “Bushe nalyumfwishe ububi umuntu umo? Bushe nalishako icintu cimo icabulo kucita? Bushe ine...bushe ndabelenga ifingi? Bushe ndapepa sana?” Kabili kuti na belenga no kupepa. Kabili—kabili kuti na—kutu nasosa, “Cisokololeni kuli ine. Bushe nalicenepo umo muntu, kucifulo cimo? Nga nalicita, ndi no kucilungamika. Nangisheni fye; nshilefwaya ici cisendo.” Kabili pa myaka isano iyapitapo, ukutula ilyo nafumine mwi bala, kwaba lyonse icisendo icaikala mu mutima wandi.

<sup>58</sup> Naliya ku mpili. Naliya ku mbali ya bamba. Naliya ukuli konse, no kupepa no kupepa no kupepa, kabili cena tekuti cifumepo fye. Kabili natontonkenye pa fintu fyonse, nga nalicita icintu cimo.Lelo cena, nalyo line, tekuti cifumepo; nali fye muli bunkole, icapala.

Kabili cena ceni nganshi ukutila ici kuti cafumishiwapo pa nshita fye ilyo iyi Mbila yaisa, mwamona, iya mulucelo. Nomba, bushe cali ni Lesa ukucikanya pa mulandu wa ici? Nshishibe. Mwamona, ine...Fyonse ifi fintu fyali mu mano yandi. Imwe kuti mwaelenganya ifili mu mutima wa muntu ilyo mwakwata ica musango filya, mwamona, ukutontonkanya pa filecitika; kabili, ukwishiba, ukweba abantu, ukwishiba ukutila bamo bali no kumfwa ukusosa ukushilingile, kabili bamo bali no kuya *ulu* lubali, kabili *lulya* lubali. Kabili namwishiba ifyo cena cili. Kabili bamo bali no kucetekela, kabili bamo tabakacetekele. Kabili, lelo cilya eco muli no kushipikishako.

<sup>59</sup> Musango nshi wingacisosa ukwa bula ukumfwise ububi? Musango nshi winga cisoselamo, ukuti cicitike? Musango nshi winga cisoselamo, ukulangisha abantu ukutila iwe tauli—taulesonta bena, ukutila wali batemwa? Musango nshi wingaba uwe funde kabili uwa shipa, kabili nomba uwacitemwiko? Kabili, owe, musango nshi uli no kucipelelamo? Elyo kabili akalanda kuli ine nga nshilecipela! Mwamona? Kabili mwacimone ci. Mwamona? Cena, te cakusunguka, cila kusunga iwe ukuba uwa mwenso kabili uwa fulungana.

<sup>60</sup> Nalishile ukufuma—ukufuma...naishile ukufuma ku Arizona, ku kumanya ibumba lyaba munyina kuno, abo abaya mukulunga pamo na ine mulya mu Colorado, cila mwaka.

Nomba, abantu bamo balisunguka, “Cinshi ico wila mukulunga? Cinshi icilenga iwe?”

Mwamona, *muno*, muleisusha, ine ndepela; *kulya*, ndesushiwa, pa kutila ningapela. Mwamona? Nomba, nshiya fye mukulasa inama. Cinshi, abantu, uuli onse muno uyo uya pamo na ine, alishiba ukutila ndacilukila inama sha mu mpanga amakana kabili ukwabula no kushikumyamo. Nshicita.

<sup>61</sup> Nomba, kuno te kale sana, natendeke ukulase nama isha bashimakwebo Abenakristu, ilyo baya kulya, no kusosa, “Billy, ukanjipaileko imboo, ukanjipaileko imboo ikota, ukanjipaileko elk, ukanjipaileko *iyi*, atemwa *ilya*, *ibiye*.” Ine kuti naya kunse no kulase nama sha mu mpanga, ukufuma kukwa kulyo no kwa kuso. Shikulu alingafwilishe pa kutila ninga mona no kusanga inama sha mu mpanga, kabili ukulasa ukusuma, no kushilasa. Kabili—kabili bena bekala fye no kulanda pa makwebo yabo.

<sup>62</sup> Elyo Shikulu alinjebele ukukana cita cilya nakabili. Kabili ine—nalyumfwile ububi pwalwa cena, e ico nalilaile Wene nshakacite nakabili. Iyo. Natile, “Nga cena ca mukampampa kabili umuntu umo aleikabila, nkacicita. Lelo nga bena tabaleikabila, ine nshakacicite.” Balya fye abantu, balikwata indalama ishingile ku kushita inama ne fintu. e ico cinshi ico ningile ukucitila cilya? Lekeninama ibe iya mweo nga ta muleya mukuibomfya.

<sup>63</sup> E ico ningile ukuba neka. Kabili umuntu uuli onse, uyo uya mukulunga pamo na ine, alishiba nshilunga no muntu nangu umo. Ndaya kunse palwandi, ukuya ikala neka. Ine kuti naya pamo na bena, ukuya kwata isenge mu nshita ya bushiku, ukwiminina palya no kupepa, kabili na fimbipo.

Lelo kwaliko na bambi abengi bakapyunga kulya. Kwaliko, mulya mu mpili uno mwaka, kwali Munyinefwe Pamer. Ndecetekela na cimumona ku cifulo cino pa kashita. Uyu Ali pano, naikala pano, Munyina Pamer. Kabili Munyina Bob Lambert, ena aciba muno mu lucelo, na cimumfwa

alebilikisha pa cifulo cimo. Ndemona ena acili ali muno. Elyo kwali munyina . . . babili abalumendo bakwa Martin, ndemona bena bali muno. Bushe emo bali, abalumendo bakwa Martin? Munyina, Munyina Martin. Iwe wali ntumine lamya ubushiku bumbi, cilya cali icisuma. Ulyo mulumendo alyundepwe, ulya munyina kapyunga.

<sup>64</sup> Bushe uli muno, ulya napepelele, pali lamya, ubushiku bumbi? Nindabako ishina lyakwe, ukufuma mulya mu Arkansas kulya. Umukashi wakwe alinjtile; umwaume alifimbile monse mumbali, kabili ne mpepo sana, alefwa. Umwaume umo wine uyo walumbwilwe, kulya ku—ku Little Rock, atemwa ukulongana ukwa ku Hot Springs, alikele mukulongana.

Kabili ena muntu umoneka bwino. Ngali muno, ndemona ena taime nomba, nakalya. Lelo nindabako ishina lyakwe. Teti ntontonkanye ishina lyakwe. [Umo muntu atila, “Munyina Blair.”—Ka.] Blair, Munyina Blair. Umo muntu. . .

Cisuma, nomba, ukwikala mukulongana pa Little Rock, ni banga abaliko, ndepilibula, ku Hot Springs, ni banga abali mukulongana? Kabili Mupashi wa Mushilo walilandile kuli ulya umuntu umunono no ku mweba ukutula kasebanya aleesha ukumulenga uku nkana, ukusosa ukuti nali “kasesema uwa bufi.” Kabili umwaume alipele ubunte pali cena ukuti cali icine. Mulemona ifyo Kasebanya alecita? Umwaume taya kuli ba shinga’nga. Ena tacetekele mukuya kuli ba shinga’nga. Lelo Satana alishibe ubu bulwele bwali no kumupuma, kabili ali no kumwipaya palya pene. Mwamona? E ico aleesha ukumulenga ena ukukana. Kabili Umupashi wa Mushilo, mu nkumbu, walilandile kuli ena no kumweba ukukana cita cilya; umwaume, ukubo mweni, balimwebele ukukana cita cilya.

<sup>65</sup> Kabili nshita imbi iya bushiku, umukashi wakwe alinjtile kabili atile, “Munyina Branham, ndecetekela ukuti ena alefwa.” Atile, “Ena ali—ena nafimba monse. Kabili, impepo yakwe, nafulungana mu mano, mu pepi.” Kabili atile, “Icintu ica kulekelesha ico asosele, ‘Ita Munyina Branham.’”

Natile, “Bushe naukwata icintu icili conse, akacola kobe nakakwata citambala?”

“Iyo.” Nali mu Tucson; ena ali mu Arkansas.

Kabili natile, “Naukwatako icili conse?”

Atile, ndecetekela, icakwe “icitambala.”

Natile, “Nomba bika ukuboko kobe pali ico citambala, kabili ukwikatilila lamya mu kuboko kumbi.” Kabili nalipepele no kulomba Lesa ukuba uwa luse kabilli no kukanya ulya umulwani.

<sup>66</sup> Kabili alile no kubika cilye citambala pa mwaume. Kabili ulucelo ulwa konkelepo, alintumine lamya.

Nomba, muli nalimo ama ora amakumi yabili na fine, atemwa ayanono ukucila yalya.

<sup>67</sup> Munyinefwe musuma, nshi mumwene muno bushiku nakalya, Munyina Roy Roberson. Kabili pa nshita imo, namwishiba, Munyina Roy alingo muntu umushilika. Nga ena ali muno, ine—ndesubila aleiluka, pantu ine—ine—nshileebaula cilya. Lelo ifintu fyonse fili fye funde, ena ali ni sajenti mu Bashilika, na mwishiba, kabili mulingile mwabelesha ukutungulula abantu nge fyo bacita mu Bushilika. “Cisuma, ifi fintu ifya bu mupashi fya muntu umbi,” te ena! Lelo Shikulu ali musungile. Ena ngalifwile; bena balilambalike kulya ukuba uwafwa, panshita itali. Shikulu ali mundepe; ena alikonka ukutula lilya. Lelo fyonse ifi fintu ifya bu mupashi, ena taishibapo pa lwa fyena, ne fimonwa.

<sup>68</sup> Kabili kuno te kale sana, mwe bengi mwalishiba icimonwa ico capelwe kuli Munyina Roy ilyo nshilaya kulya, palwa ena ukumona ine ukwiminina pa mulu walupili palya, muli lulyo Lubuuto, kabili Ishiwi lyalefumina kuli ine. Cilya cafumishe ukutwishika konse kuli Munyina Roy.

<sup>69</sup> Kabili inshita imbi iya bushiku alipuminwe mu musango uwa kutila mpaka alilwele nganshi, kabili aishile kwata impepo sana, ne fintu. Kabili doctor ali mupele umuti, ifili fyonse, elyo kabili tafyacitile ubusuma nangu bumo. Kabili aishileba na mu musango mpaka ena alifililwe no kuisesha umwine nakabili. Amolu yakwe ne fintu fyali, kwati, ukufwe citu.

<sup>70</sup> Kabili munyina umunono umubusu alilashilwe mutupimfya, ne fipolopolo ukufuma kuya makumi cinekonse konse na cinekonse konse, German amakumi cinekonse konse na cinekonse konse. Kabili cena—cena cali fye i...Kabili ndetontonkanya bonse abo ali na bo balipaiwe, kano fye ena, kabili kulya alifwantilwe mutupimfya.

<sup>71</sup> Kabili namwishiba ico cacitike? Nalyebele umukashi wakwe uwacindama, Nkashi Roberson, uku...Atile...Natile, “Naukwatako icili conse uko?”

<sup>72</sup> Atile, “Ninkwata akatambala ako nshita imo wapepelepo.”

<sup>73</sup> “Kabiye uye kasenda.” Kabili nali mu Tucson, kabili abikile ukuboko kwakwe pali kalya, no kupepa no kwebaula, kabili natile, “Nkashi Roberson, cena cili no kufumapo.”

<sup>74</sup> Icintu fye Cimo calinjebele kulya, “Cena cili no kufumapo. Cisose!” Kabili muli hafu wa ora, impepo yaishilepwa; ena ali mu kitchen, ukufwaya icintu cimo ukuti alye. Mwamona? Mwamona?

<sup>75</sup> Ico ndeesha ukusosa, “Mwilaesha ukulufya isubilo lyenu.” Mwilaleka Satana alemweba ifya bipa pali ine; pantu, kwalibako ifingi. Lelo mulekwata fye lilye subilo; pantu, nga

tamulecite co, cena tacakacitike. Mwilalolekesha kuli ine ngo muntu; ndi muntu, ndi uwaisulamo ifilubo. Lelo lolekesheni kufyo ndesosapo palwa Wene. Cena ni Wene. Ena e ulya Wine.

<sup>76</sup> Ilyo twali mu Colorado, mwamona, ilyo twali kulya lubali, twalibwelelemo. Kabili kwena kwalyumine nganshi. Inama sha mpanga te kuti shimoneke. Munyina Wheeler, Shikulu ali mupalile no kumupela i—icikombe icisuma, kabili twali aba nsansa nganshi palwa cilya. Yena yali ni nshita iya kubalilapo ena atalile ukuba mumitengo mukulunga, kabili Shikulu ali mupalile. Elyo kabili nalilashile icikombe icikalamba ico nalefwaya pa myaka amakumi yabili, nalefwaya yena, Munyina Banks na ine twalefwaya yena pa nshita itali. Kabili ilyo nacicile . . . Ukulasa ne mfuti yandi mulya mu calo icakaba, ukuileta mu catalala, catutumwine umulombe, nangula kwaliko umutofwe. Kabili yaliilashile ama inch ayengi, no kupume nama, iya iminine pakati ka fimuti, uko tayalingile ukulasa; mupepi ukucila filya, ico nga caliipeye nama mu buntu mu kashita fye. Lelo yaliilashile pa mulu sana, yena, yalitolweke, kwati yaliwile nga filya.

<sup>77</sup> Kabili Billy ali pamo na ine, kabili atile, “Cilya cali ipeye.” Kabili natontonkenye calicicitile, naco; lelo ilyo twaile kulya, te fyo cali. Atile, “Iwe walilasa icimuti.” Nalilolekeshe pa mulu na panshi, tapali icishilwa pa cimuti. Elyo kabili nalile mukuifwaya.

Elyo kulya kwaishile icishibilo icakusoka. Kwaliko mubutuntulu abantu umwanda, pa mulu wa ifwe. Kabili Munyina Palmer na bena ni nte kuli cilya. Kabili Munyina Evans, cilya cishinka, ena ali kulya; Munyina Welch Evans no mulumendo wakwe Ronnie. Ndecetekela na cibeta, inshita iya pitapo. Kabili ibumba ilikalamba ilya bantu balile pa mulu wa ifwe, isho beta inkambi ya go'mbe kulya, uko bakacema ba ngo'mbe bekala no kuninapo, balalenga ingo'mbe shibe ishapatukana. Naleikala muli ilye nkambi ne mwine kabili nalicemene shilye ngombe no kushipatulanya.

<sup>78</sup> Elyo kabili, e ico, mulya, kwaliko nalimo abantu umwanda. Lelo uli onse alishiba, muli cilye calo, ilyo icipupu cabilishiwa, mulingile ukufumako lilya line. Ulya e mulandu wine Munyina Palmer na bena bafumineko bwangu, pantu bena bakwete fye three speed transmmission muli motoka yabo, kabili bena baishile fuma kulya; pantu, nangula, muli kulya, kabili kuti mwaikala imilungu. E ico batile, “kuli icipupu icileisa,” ukubilisha, mu mapepala, napa cilimba. Ibumba panuma ye bumba, mu butuntulu ifintu fyonse ukufuma ukushinguluka mulya balile. Bena balile, lilya line, pantu balishibe ifya kufuma mulya.

<sup>79</sup> Lelo ba munyinane balikwete ba licence ya ba na sele babili, kabili bena—bena tabalefwaya ukuya. E ico ine—natile,

“Cisuma, twalaikala.” Lelo nalikwete ukulongana ukwa leisa, mu nshiku fye mutanda, kabili nalingile ukubwelelamo ku Tucson.

<sup>80</sup> E ico, umukashi wandi umunono, ine...twalyupana imyaka amakumi yabili na fibili. Kabili imyaka amakumi yabili, no kusefya kwesu, ndaba kulya cila nshita; cilemoneka fye ukufika palya. E ico ine—ninkwata incende inono uko lyonseinja no kupepa, kabili camoneke kwati ni ncende uko na mutwele.

<sup>81</sup> Namwishiba, napangile icapala nge cintu icinono, namwishiba, nshakwete indalana ishalinga ku kuya pa bulendo bwa kulunga kabili ne nshita yandi iya kuipakisha, e ico ine—ine—camoneke kwati nasendele umukashi wandi pa bulendo bwa kulunga mukuipakisha. E ico twali mu New York, kabili ndeibukisha ukumwafwilisha pa milando ne fintu, ukuya ku cifulo. Kabili nalikwata icifulo icinono kunse kulya, ine lyonse ndatontokanya pali ena ilyo naya kulya pa kusefya kwesu. October ubwalenga amakumi yabili na fitatu e lintu inshita iyayana isulwa kulya. Kabili, imyaka amakumi yabili, nshatala ukuba ku mushi, lyonse ukuba kulya.

<sup>82</sup> E ico bulya bushiku cali ukusefya kwesu. Kabili Munyina Mann... Natile, “Nomba inga imwe ba munyina...” Natile, ku mulilo, lulyo lucelo, “Nomba nga...” Ilya nshita ya bushiku, ntile. “Nga muli no kufwaya ukwishiba, ibukisheni, ifwe limbi twalaba muno umweshi.” Pantu nimona ama futu amakumi yabili aya menshi makasa ukuwa mukashita fye, inshita ya bushiku. Pakuti fye, imwe kuti mwaya kulya lubali, kabili muli fye abauga kabili abasuma; kabili ulucelo ulwakonkelepo, amenshi makasa yali ayashika ukufika *umu*, ukucila, nalimo pa mulu we tenti lyenu. E ico kanshi natile... Kabili lyena mulekala kulya mpaka filya fyasunguluka. E ico imwe mulaba nalimo ba mailoshi ikumi limo na fisano atemwa amakumi yabili mukati ka matololo. Kabili e ico kanshi natile... Kabili nga caba ica mukampampa, mucine, balatuma indeke no ku mufumyamo imwe. Lelo, ilingi line, bena fye... kabili takuli nangu umo uwakonaika, bena balingile fye ukulolela kulya.

<sup>83</sup> E ico bonse balaya mukwangufyanya lilya line fye ilyo baumfwa kulyo kubilisha, ntile. E ico twaishile bwekela kulya, kabili natile, “Nomba musale ifyakucita. Nga mulefwaya ukuya, ndi kuno ukulunga pamo naimwe, kabili nalaita umukashi wandi no kumweba, “Ukusefya Ukwakusangalala!” Lelo natile, “Kanshi, muli cilya, naine nkacita... Nkacita... tuli no kushita ifya kubomfya, pantu ifwe limbi tuli no kwikala muno.” Tatwakwete umukate lilya. Kabili nshilefwaya nakabili ifipapatu panshita itali, filye fipapatu! E ico, lilya, nalifilile fyena mu Canada, pa nshiku nalimo amakumi yabili na cimo, kabili ine mucine nalifikwite nganshi filye fintu. Kabili e ico kanshi nafwaile ukushita umukate.

<sup>84</sup> E ico basosele fye ukutila balefwaya ukwikala. E ico takwali nangu cimo ica kucita...ukwikala. Lelo Munyina Mann na ine twalile kunse, kabili twalile kulya lubali kabili nalishitile ifya kubomfya. Kabili nalitumine lamya ku mukashi wandi, kabili lamya taaswikwe. Takwali nangu umo uwaaswike; e ico nalilolele nalimo ora mpaka twali shitile ifya kubomfya, twalibwelelemo, ukutuma lamya, ena alyaswike. Kabili nalitumine lamya kuli Nkashi Evans.

Ndecetekele Nkashi Evans ali muno. Kabili nalilandile... Ee, Munyina Evans na Nkashi Evans bali muno.

<sup>85</sup> E ico nalitile Nkashi Evans, ukufwaya Munyina Evans, no kumweba. Atile, "Nalatumina Nkashi Branham no kumweba." "Ukusefya ukwa Kusekelela," mucine, namwishiba. E ico, lelo ena aile mukushita, ukuya shita fimo ifya kubomfya ifya bana.

Elyo kabili twali bwekele. Kabili ulucelo ulwa konkelepo, ni cinshi icali mulwele kano amakumbi. Tayalokele kulya lubali inshita yonse iya mwaka, kabili kwali ukwa uma nganshi. Kabili balitantalisheko inshita iya yana iya kulunga, inshiku ishinono na shimbi, pa mulandu wa kuma.

<sup>86</sup> Cisuma, nasosele kuli ba munyina lulyo lucelo, "Nomba, imfula iyakubalilapo iyalatendeka ukuloka, amenshi makasa ya kubalilapo, ukusansa ukwa kubalilapo, icili conse, kabiyeni ku nkambi na maka fye nganshi nge fyo mwinga cita, pantu mukati ka miniti ikumi limo na fisano imwe te kuti mumone no kuboko kwenu ku ntanshi yenu. Mwamona? Kabili yena ishinguluka fye no kupupa, kabili nshilesakamana ifyo mwaishibisha icalo, imwe—imwe muli no kwikala kulya kwine, kabili muli no konaika. Pantu inshita shimo imwe tekuti mupeme, kulyo kusansa kulapupa filya, kabili, imwe kufwa palya pene." Kabili natile, "Lilya line fye ciletendeka na kulyo kusansa, butukileni ku nkambi na maka nganshi ngefyo mwingacita, nshilesakama uko mubelele."

<sup>87</sup> Cisuma, natile, "Kabiyeni kulya no kwikala muli ifi filindi, kabili ndi no kunina apa sansama no ku kunkulusha ifimabwe pakalupili, kabili na fimbipo, ukutinya bana sele palya pa mulu, no kushibutushisha pesamba, imwe musendepo iyo mulefwaya."

<sup>88</sup> E ico nalitendeke ukunina pa mulu, kabili pali ilya nshita nalile pa mulu apo twita, "apa kwikala," incende inono kulya iyo njabukapo lyonse ukuya ku ncende itwa "Quaker Knob," kulya kwine pa ku Patukanya kwa Fyalo kulya, apa sansama nganshi. Kabili ilyo nali mupepi no kufika apa apa kwikala, ici,...amakumbi yatendeke ukulafitilako no kulafitilako. Takwali na motoka iya shele, ifwe fye fweka kulya, ukulingana...kabili bakacema ba ngo'mbe pankambi. E ico kwaishileba—kwaishile bipilako no kubipilako. E ico, mu ma miniti ayanono, yatendeke ukuloka. Cisuma, nasendele imfuti yandi no kuibika

pesamba mukati ke koti lyandi, ukucingilila apakumwena ukukana fuke cushi, kabili—kabili umulombe ukubomba; cakutila nalipunkile muli bele atemwa icintu cimo, ukubwelela, e ico ine—naikatilile fye ica kumwenapo candi nga *filya* no kwika pesamba lya cimuti, pakashita akanono. Kabili nalikele kulya, no kulapepa. Natile, “Shikulu Lesa, Imwe ni mwe Yehoba Umukalamba, kabili nali Mutemwa.”

<sup>89</sup> Ni finga ifya ncutikile ifyo nakwete! Nalisontele kuli ba munyina, Munyina Palmer na bena, ififulo. Uko, kapumpe, namwishiba, nali mumwene ukuya pa mulu bulya bushiku, namwishiba, kabili... Filye fifulo uko fyonse ifi fyacitike mulya. Cena cintu icacifyalilwa kuli ine, mulya. Nalikwata ukwishiba ukukalamba ukwingi nganshi na Shikulu wandi, pa mulu mulya mu mpili. E ico imwe te kuti muye fye kulya ukwabula ukumumona Wene; ena aba fye ukuli konse.

<sup>90</sup> E ico kanshi, ilyo ine—ine naikele kulya, lyena utumatoni twalitendeke, kabili umwela waleshinguluka, nga *filya*. Kabili natile, “Cisuma ninjishiba inshila ya kuilako mwisamba, lelo ningile ukufuma pano ino ine nshita.” E ico natile... .

<sup>91</sup> Kabili nalilolekeshe pesamba, kabili ine tekuti mone pa mpela nakabili; yalya makumbi ukulashinguluka fye no kwenda, kabili kulyo kusansa kulapupa ukulawa. Kabili cilye cali palya, icipupu! Ukubilishiwa pa nshiku ishingini, “Icipupu icikalamba cileisa!”

<sup>92</sup> Munyina Tom ali muno. Munyina Tom Simpson, ukufuma kulya ku Canada, alyumfwile kulya ukubilisha, kabili ena alyebelwe ukukana pita muli cilye ciputulwa ca calo, pantu uku kubilisha kwatile, “Cena cikaba icipupu.” Ubelele pesa, Munyina Tom? Ndetontokanya ukutila, ee, pano pene. Kabili ena... .Icipupu caleisa! Cila muntu alelolola pali cena.

<sup>93</sup> Cisuma, nalibikile mfuti yandi no kuibwesha mukati ke laya lyandi, nge fi, ilaya lyandi ilya kashika, natendeke ukulatentemuka ulupili. Kabili ilyo natendeke, nalikwete nalimo citika uwa mailoshi ukufuma apakwikala; kabili, owe, mwe, kabili amatoni aya kulu aya menshi makasa, nga *filya*, kabili umwela ukulashinguluka, pali lulyo lupili, nokupupa. Tekuti mone pesamba nakabili. Tekuti mone nalimo ama fiti amakumi yabili ku ntanshi yandi, atemwa amakumi yatatu. Kabili nalishibe ukwisa pesamba apo apanono, ifyo twita, “inuma yakwa kapoli inono,” umukolwa unono, ine lilya naishilefika ku mulonga, elyo kabili nalishibe ukukonka umulonga, kabili ukwa kuya, nga kwaishilebipa nganshi.

<sup>94</sup> Kabili e ico lilya nalitendeke ukutentemuka, kabili nafikile nalimo citika pe samba palya, kabili Icintucimo casosele kuli ine, palwalala fye ngefyo muleng’umfwa, “Iminina, kabili bwelelamo!”



<sup>95</sup> Cisuma, natontonkenye, “Ni cinshi ico naletontonkanyapo? Nalimo cena mano fye yandi.” Kabili ine nalifililwe fye ukutampulo lutampulo nalumbi pantanshi.

<sup>96</sup> Dabidi alinteyanishishe umukate lulyo lucelo, kabili ndetontonkanya alyeseshe ukumpelako na ine pa kuteyanishisha ba wishi umu, inshita imo, na kanyense no buci, filya fye fyeka efyo twakwete. E ico balinteyanishishe baloney kabili, owe, nshishibe ifyo conse cali, icapombelwe mulya! Kabili nalicikwete mwi laya lyandi, kabili cena calibombele mukati ke laya lyandi. Natontonkenye, “Nalaiminina fye no kulya ici, kabili nalimo nala. . . Calaba fye bwino kanshi.” E ico nalifumishe umukate, nalimo teni koloko, kabili natendeke ukulya umukate. Kabili ilyo natendeke ukulya umukate, natontonkenye, “Nomba nalaba fye bwino.”

Kabili natendeke ukulaenda, lelo Icintucimo calisosele, “Bwelelamo uko fumine!”

<sup>97</sup> “Bwelelamo upite muli ilye nkuka, citika wa mailoshi atemwa ukucilapo kunuma pa mulu wa lupili, muli ilye mitengo iyatikama?” Uko, imwe te kuti mumone apatali nga pali ilya organ! Lelo ndetendeka ukuba umuntu umukote, kabili nabo Mwinakristu nomba pa myaka amakumi yatatu na fitatu; kabili ninjishiba, te mulandu ifyo cili, ifyo cimoneka icabuwelewele, bika mano kuli Shikulu, cita ifyo Shikulu alesosa.

<sup>98</sup> Kabili nalipilibwike no kubwelelamo apa kwikala, ukulapampansha inshila yandi ukubwelelamo. Owe, ukusansa kwaile ku lefulilako no kifuliko; kwatendeke ukulafitilako no kulafitilako. Nalikele panshi kulya, kabili na bikile fye ikoti lyandi pa mulu nge fi, atemwa ilaya lyandi pa mulu wa cakumwenako nakabili; naikele panshi. Natontonkenye, “Ni cinshi ndecita kuno? Mulandu nshi ningabwelela pa mulu pano?”

<sup>99</sup> Kabili nalilolele fye pa ma miniti ayanono. Kabili nalitendeke ukwima nakabili, kabili palwalala fye nge fyo natala ukufwaya ukumfwa, Ishiwi lyatile, “Ndi Kalenga uwa Myulu ne sonde! Ndapanga ifimwela ne mfula.” Nalifulile icisote candi.

<sup>100</sup> Natile, “Yehoba Mukalamba, bushe ulya ni Mwe?”

<sup>101</sup> Atile, “Nali Ulya Uyo uwalengele ifimwela ukuleka pali bamba. Nali Ulya Uyo uwalengele amabimbi ukuya panshi. Nalilengele imyulu ne sonde. Bushe nshali Ulya uwakwebele ukulanda kuli filya, pa tupale, kabili twaishile monekela? Nine Lesa.”

<sup>102</sup> Nomba, ilyo ishiwi lyalanda kuli imwe, lolekesheni Amalembo. Nga tacili mu Malembo, cilekeni ceka; nshilesakamana ifyo cingaba palwalala, imwe talukeni ukufuma kuli cena.

103 Natile, “Ee, Shikulu.”

104 Atile, “Landa kuli filye fimwela kabili na cilye cikuka, kabili fyalaya.” Nomba, iyi Baibele ili ku cinso candi, icili bumi bwandi buli muli Cilya.

105 Nalimine, natile, “Nshiletwishika Ishiwi Lyenu, Shikulu.” Natile, “Amakumbi, amenshi makasa, imfula, ukusansa, nakanya ukwisa kwenu. Mwi Shina lyakwa Yesu Kristu, kabiyeni mu fifulo fyenu! Ndesosa ukutila akasuba kalingile ukufuma ili line no kubalika pa nshiku shine, mpaka ubulendo bwesu ubwakulunga bwapwa kabili nkaye na bamunyanane.”

106 Kabili yena yalepongoloka fye, ukulaya fye, “Whoooooossh,” nga filya. Kabili yatendeke ukulaya, ukuya, “Whoosh,” elyo yalile, “whew, whew, whew, *who*.” Yalilekele!

107 Naliminine shilili nganshi. Ba munyanane kulya lubali, kabili balisungwike ico calecitika. Kabili ukusansa ne mfula fyalilekele. Kulya kwalishile umwela ukushinguluka ukupita mumpili, walimishe amakumbi, kabili yamo yaile *uku* lubali; ku kabanga, ku kwakulyo ku masamba, na ku kwakuso. Kabili, mu ma miniti fye ayanono, akasuba kalibalike bwino no kukaba. Cilya cishinka! Lesa alishiba cilya cishinka!

108 Naliminine fye palya, ukulalolekesha fye mumbali; ni mfulako icisote candi, ukulolekesha. Ine . . . Imwe musosa . . . a maka yaishilepwa, monse fye.

109 Natontonkenye, “Lesu wine uwa Fyalengwa, fyonse fyaba mu maboko Yakwe. Cinshi ico Ena alenjeba?”

110 Kabili nalisendele imfuti yandi, naliwamishe apakumwena, natendeke ukubwelelamo, ukulaya ukutentemuka akalupili. Kabili Icintucimo catile kuli ine, “Cinshi teti wendele pamo na Ine ukupita umu mu matololo, enda pamo na Ine?”

111 Natile, “Ee, Shikulu, no mutima wandi onse; cena kuti caba icintu cimo icapulishamo ico ninga cita, cali ukwenda na Imwe.” E ico nabikile mfuti yandi pa kubeya kwandi, kabili natendeke ukwenda ukupita mulya; tamwatalile ukukomamo akasembe muli yena, imiti yantendekelo, ukwenda ukupita mulya.

112 Kabili ilyo nacistile, nalyendele ukulaya, mulya mukati ka utu tushila utwa nama, naumfwile kwati, “Ndecetekela nalaya kulya ku ncende uko . . . mailo bwali ubushiku bwesu ubwa kusefya, kabili nkeminina fye palya pa ma miniti fye ayanono; ngo kuposha fye ukunono kuli Meda, kulya ukwaba ibumba ilinono ilya malonda, pa mulu pa ka muti akanono.” Kabili natile, “Ndecetekela nalaenda fye kulya lubali, ngo kuposha fye ukunono ku kusefya kwesu. Elyo kabili ndi no kubwekela ku lubali ulu lumbi, muli iyi mitengo iyatikama, no kwenda enda, no kushinguluka kulya, ukulola ku Corral Peaks, no kubwela ukupitila kulya lubali.” Ukulaenda fye no kusangalala.

113 Nalesosa, “Tata, ninjishiba Imwe muleenda na ine. Kabili ifyo lyabe shuko; takwaba nangu umo uwapulamo uo ningenda pamo nankwe; Lesa wine!” Kabili kalya kasuba akakaba!

114 Nangula ni lilya ilyo nafumine mu mpili. Naliminine palya bashitisha amafuta, kabili natile, “Ubushiku ubusuma!” Inshiku shitatu panuma. Tayatalile ukuloka muli cilye ciputulwa ca calo mpaka inshiku shine shalipwile. Akasuba kalibalike cila bushiku. Bushe ico cishinka, ba munyina? [Ba munyina batila, “Ameni.”—Ka.] Mwamona? Kabili takwali na ma kumbi mulwelele.

115 Kabili naishilefuma palya bashitisha amafuta, kabili natile, “Mucine ubushiku ubusuma.”

“Ee, eflyo cili!”

Natile, “Kwena nakuma nganshi.”

116 Atile, “cena cintu iceni!” Uyu kashitisha atile, atile, “Namwishiba, balitweba ukuti twali no kukwata icipupu icikalamba, lelo mukupumikisha fye caishileleka!”

117 Naishilefika, kulya ku cishilwa ca New Mexico. Billy na ine, umwana wandi, twalile mu kancende akanono kulya kukusenda fimo... ulucelo ilyo twafumineko, kabili natile, “Mucine bushiku ubwawama.”

“Ee, eflyo buli!”

Natile, “Cilemoneka kwati kwali ukwauma nganshi.”

“Ee, eflyo kwali!”

Natile, “Bushe uli wa kuno?”

118 Atile, “Iyo, ine mfuma ku Wisconsin,” atemwa pa cifulo cimo. Atile, naba kuno nalimo imyaka amakumi yabili, e ico ndemona kuti wa kwita ku mushi.”

119 Natile, “Iwe uli mwikala calo kanshi, ndemona.” E ico natile, “Ee, mukwai,” natile, “kulemoneka kwati kwali ulukungu nganshi.”

120 Atile, “Namwishiba, icintu iceni nganshi icacitike!” Atile, “Twalikwete ukubilisha ukutila twali no kukwata icipupu, na menshi makasa ayengi; kabili fyena mucine fyalitendeke, elyo fyaishile leka!”

121 Natile, “ Iwe taulepilibula ifyo,” kabili kwali tondolo nganshi.

122 Kabili nashile ku nga’nda. Kabili Munyina Tom atile ukuti bali mwebele ukukanaya ilya nshila, icipupu calipwile. Kabili ena alishile ukupita mu calo, ukwabula itoni lya mfula atemwa icili conse! Ena acili ni Lesa, mwamona, mu bwingi fye nge fyo Ena atala ukuba. Mwamona?

123 Ukwenda kulya lubali, naleenda kulya...Nomba, ici ciputulwa, ndesubila umukashi wandi takakwate iyi tepu.

Mwamona? Lelo nalamweba icintu cimo. Kabili, nomba, ine—nshimweba imwe...Nalamweba fye Icine, mwamona, kabili ulya e musango fye umo uwa kucicitilamo. Ine lyonse ndasunguka mulandunshi ena tailishenye palwa ine ukuya pali aya malendo pa kusefya kwesu. Namwishiba ico natontonkenye mu mano yandi? Natile, “Kuliko abantu abengi sana ukushinguwka inga’nda. Elyo kabili ine lyonse, na mwishiba, ndi uwa mwenso. Kabili ifintu fyonse ifyo nanda, mfwaya ukulandapo, ni Lesa, Baibele, atemwa icintu cimo. Nalimo ena atontonkanya fye cena kutushako fye panono kuli ena. Ena alansenda pa nshiku ishinono, ukuya mukulunga.” Ine, ukutontonkanya citika pali cilya, ukuya kulya lubali.

<sup>124</sup> Cilya, nine...Ine, nalayebelela kuli ena, kabili nine—nalilombele kuli Lesa ku kumbelelako uluse ku matontonkanya ya filya. Pantu, naleya ndeenda kulya, natontonkenye, “Cisuma, ena atontonkanya...Cisuma, yangu ishuko! Ena, ena mubomfi, mwalishiba, kabili—kabili inshita fye yonse ilyo ali kunse umo bepikila, atemwa kucifulo cimo kunse mu i...”

<sup>125</sup> Kabili imwe bonse mwalimwishiba, ilya mashini ya kuwashishako ilabomba inshita fye yonse. Kabili e ico kuti naya kulya, no kumutinta; natile, “wilawasha muli uyo musango. Landa kuli ine. Mwamona, nalikutemwa. Ndefwaya iwe ukunjeba icintu cimo; unjebe nga ulacita na iwe.”

<sup>126</sup> Atile, “Cisuma, mwalishiba ndacita,” elyo alatwalilila ukuwasha na maka nganshi nge fyo lyonse acita.

<sup>127</sup> “Nshilefwaya iwe ukucita cilya. Ndefwaya iwe wingile muno no kwikala panshi kulubali lwandi.”

<sup>128</sup> “Owe, Bill, ninkwata imilimo ingi iya kucita!”

<sup>129</sup> Kabili natontonkenye, “Cisuma, mwamona, ukwisa kuno, ena alakwata inshita ukubomba umulimo wakwe.” Ukwenda ukulaya kulya, ukutontonkanya cilya.

Nomba, ibukisheni, nacibika iyi Baibele apa lubali pa kutila mwingamona ukuti ndi kucinso ca Cebo.

Ilyo naleenda kulya, icintu cimo calicitike kuli ine. Nalitendeke...

<sup>130</sup> Intanshi, naletontonkanya palwa ilyo na musendele mukuipakisha kulya kwine. Ena ali uwaemba, umunono, umufishi, umukashana uwa menso aya kashikila, kabili nalemwimya ku ciluka pali iyi milando, namwishiba, kabili ne fintu fyonse, kabili ukwasha ukumutwala pa mulu palya muli iyi ncende uko naipaile bere umo. Kabili nalefwaya ukumulangisha umo, kabili e ico...ni kwisa uko mfumya aba babere. Kabili ena afwele insapato shandi isha bukacema. Kabili cilya cali nalimo imyaka amakumi yabili na ibili, atemwa imyaka amakumi yabili na cimo ilyo takulaba cilya;

imyaka amakumi yabili na fibili, ndecetekela cali, iyapitapo. Ifwe twalyupene mu 1941. Kabili nalemwimya, namwishiba, pa mulu wa iyi milando.

<sup>131</sup> Kabili natontonkenye, “Nomba, umuntu umunono umubusu, ukwikala na ine, ena natendeka ukukwata imfwi.” Ee. Natontonkenye, “Cisuma,” kabili nalile. . . [Munyina Branham awamya pa mukolomino wakwe—Ka.] Kabili nshabeyele imyefu pa nshiku ishinono, kabili nasangile ukutila nali nemfwi, na ine! Kabili nalimwene umwefu wandi ukumonekela ukufuma uku, uwa mfwi, kabili natontonkenye, “We mulumendo umukote, uli fye mupepi no kupwa nomba. Mwamona, iwe, uli no kucite cintu icili conse, ulingile ukwangufyanya. Iwe uleya ulekota, na iwe.” Mwamona?

<sup>132</sup> Kabili e ico ilyo naleya nga filya, icintu cimo calicitike. Apo pene fye, mu micitile yonse, imibele, nali umulumendo, natontonkenye ngo mulumendo. Kabili nalibikile umutwe wandi panshi, kabili nalilolekeshe pa mulu. Kabili palwalala nge fyo natala ukumumonapo, palya aliminine ku cinsu candi na maboko yakwe natambalika. Kabili naliminine; na fikine icinsu candi. Nalilolekeshe. Natile, “Meda, bushe ulya niwe, Mutemwikwa?”

<sup>133</sup> Nalilolekeshe apa, natontonkenye, “Nomba ni cinshi icicitike?” Kabili natontonkenye, “Ee, ine ndeenda pamo Nankwe.” Kabili calipilibwike lilya, nalibwelelemo ukuba umuntu umukote nakabili, kabili icimonwa calile ukufuma—ukufuma kuli ine.

<sup>134</sup> Kabili naliminine; nalifulileko icisote candi nakabili, nalicibikile pa cifuba candi. Natile, “Yesu, umutima wandi walikwete icisendo icikulu, pa myaka. Nshilingile ukweba Imwe ukutila ndi ne cisendo. Nalilapila, nalilapila, nalicita ifintu fyonse ifyo naishiba. Kabili mulandu nshi cena ici cisendo tacifuma pali ine?”

<sup>135</sup> Kabili nalitendeke ukulaenda fye. Kabili ilyo naninine aka kalupili akanono, nalimo amakumi yatatu, amayadi amakumi yane ku ntanshi yandi; nalitendeke pa mulu wa aka kalupili akanono, natendeke ukulaumfwa ukunaka nganshi. Kabili kwaliko akamuti akanono, nalimo ama inch ikumi mu butali, kalishile kabili kaapangile kwati L, elyo kabili ka ishile ololoka nakabili. Kabili lilya line fye nafikile kulya, naumfwile ukunaka sana naletalantanta. E ico ine fye. . . nalifwele icisote candi nakabili. Kabili na shintilile fye umutwe wandi kuli ici; ukuninga fye bwino, ukubika umutwe wandi pano pene pali kalya kamuti akanono, nge fi. Cena mucine mulibene. Efyo caba, cimoneka nge cimuti icitwa birch, mulemona. Kabili cena ni. . . Nalishintilile kulya. Kabili naliminine fye palya no mutwe wandi uwakontamikwa, kalya kasuba ukubalikila mu numa yandi. Kabili naletontonkanya, “Lesu wine, ulya uwasalangenye ilye mfula kabili na ulya umwela!”

136 Kabili nalyumfwile icintu cimo ukulaenda, “pat, pat, spat.”

137 Natontonkenye, “Ni cinshi cilya? Amenshi yonse na yakama. Akasuba na kafuma. Ni cinshi cilya spat?” Nalolekeshe panshi; cali amenshi ukufuma mu menso yandi, ukukonkoloka ukupita mu myefu isha mfwi no ku tonena pa mabula ayauma ayo Lesa aumike, ayali kuntanshi yandi. Kabili naiminine fye palya nge *fi*, ukushintilila ku cimuti. Ukuboko kwandi, *uku* kuboko panshi, kabili umutwe wandi washintilishe pa cimuti, ukuboko kwandi mushipi wa mfuti, nge *fi*, ukwiminina palya, nalelila.

138 Natile, “Lesa, nshili uwalinga ukuba umubomfi Wenu.” Kabili natile, “Ine, munjeleleko, ine—nalicita i...nalicita ifilubo ifingi. Nshapilibwile ukucita ifilubo ifingi, Shikulu. Imwe mwaliba bwino nganshi kuli ine.”

139 Amenso yandi ayashibata; kabili nalyumfwile icintu cimo cileenda, “stomp, stomp; stomp, stomp.”

140 Naiswile amenso yandi, kabili ukwiminina kulya kwine kuntanshi yandi kwaiminine banasele batatu. Kabili natontonkenye, “Ilya palya iyakwa Munyina Evans’ imo, Munyina Woods’. Kabili palya pali banasele batatu, mwamona, shilya shine esho ndefwaya.” Kabili naleiminina panono panono; nalisendele imfuti yandi. Natile, “Ine teti ncite cilya. Nalilaya Lesa ukutila nshakacite cilya.” Mwamona? “Nalilaile kuli Wene nshakacite cilya.”

141 Kabili icintu cimo catile kuli ine, “Lelo cilya cili palya!”

142 Kabili nalitontonkenye, “Ee, Sa-...Cilya eco u—umuntu aebele Dabidi, inshita imo, ‘Lesa namupela, natile, mu maboko yobe!’” Namwishiba, Imfumu Shauli.

143 Kabili Yoab alimwebele, atile, “Mwipaye! Ulya nalala palya!”

144 Kabili atile, “Lesa akanya ukutila ninga kumya uwasubwa Wakwe.”

145 Kabili balya ba na sele baiminine palya no kulolikisha kuti ine. Kabili natontonkenye, “Shena tekuti shibutuke. Takuli inshila kuli shena ku kubutukilamo. Shena tashili amayadi amakumi yatatu ukufuma kuli ine. Kabili nalisendele iyi mfuti ukwiminina apa, kabili palya pali ba na sele batatu. Iyo, tekuti ncicite. Ine—ine tekuti ncicite fye.” Ena ali ni na sele umukota no twana tubili tukalamba. E ico, ine—ine—nalikene ukusende mfuti. Natile, “Teti ncite.” Ine—nshaselele. Naikele fye palya. Natile, “Ine te kuti ncicite, pantu nalilaile Lesa ine te kuti ncicite. Nangula, balya ba munyina, bena—bena tabashikabila balya ba na sele. Mwamona? Ine—te kuti ncite ci. Tekuti ncite fye.”

146 Kabili ulya na sele umukota ukwisa, alyendele. Nomba umfweni, kwaliko abaume umwanda ukulasa shena pa mulu

palya, pa nshiku shine atemwa shisano. Ukushitinya? Icishibilo ca cintu icakashika . . . Kabili nalifwele ilaya ilya kashika, icisote icakashika. Icishibilo ca ntanshi, shena ni nshi shaya; lelo shena shaliminine, shonse shitatu, ukulolekesha fye pali ine.

<sup>147</sup> Natile, “Nacifyashi, senda utunya tobe kabili uye mu mitengo. Uuli mu minwe yandi. Ine . . . Ubumi bobo buli mu maboko yandi, lelo ine nsha kucene. Nalilaile Lesa ukutula nshakacite.” Mwamona? Kabili yalishile mupepi. [Munyina Branham akonkonsha imiku ibili pa cintamba—Ka.] Ena kuti alolekesha kuli ine. Shonse shalipalamine mupepi, mpaka shaishile mupepi nganshi kuti shalya ukufuma mu minwe yandi, mupepi. Shena, kabili umwela walepupa pali shena. E ico, yalipilibwike, no kuyako kunuma panono, shonse shitatu.

<sup>148</sup> Kabili pano yena yalibwelele nakabili, yaendele ukwisa fye kuli ine. Nshaselele; naiminine fye palya. Natile, “Kabiye ni mulya mu mitengo; nali mutemwa, na ine. Mube no bumi! Mwamona, ubumi bwenu buli mu maboko yandi, lelo na lamulekelako. Imwe ngatamwa cibusuka. Namwishiba tekuti mucite.” Kuti naipaya shonse shitatu mukashita fye kamo, amasecond yatatu, nangu cibe fyo, ulubilo fye nge fyo ningalasa; kabili shena tekuti shibutuke, ukwiminina palya mupepi na ine. Mwamona? Kabili natile, “Namulekelako. Kabiye, no kuba no bumi.” Kabili naliminine palya. Shena shalitwalilile ukwenda, shaile mu mitengo.

<sup>149</sup> Nalikumwine icinso candi nga *filya*, kabili lilya line fye icintu cimo calicitike. Ishiwi lyalilandile, palwalala fye, ukufuma fye mulya mulwelele umwa kafifi, tamwali ikumbi. Cena cali mukati fye nalimo . . . mukashita akanono. Kabili Ishiwi lyalilandile, kabili lyatile, “Iwe uleibukisha ubulayo bobo, bushe taucitile?”

<sup>150</sup> Natile, “Ee, Shikulu.”

<sup>151</sup> Atile, “Nalaibukisha Ubwandi, na ine. ‘Nshakatale ukukusha atemwa ukukulekesha.’” Icisendo califumine mu mutima wandi. Cena tacatala ukuba mulya ukutula lilya; tacakabwekeshepo nakabili.

<sup>152</sup> E lyo nalishile ku Tucson. Icintu ica kupapusha, nshatala ukukwata ifintu ifingi ukucitika, apo niaisa kuno. Ine—ndecetekela cali ni Lesa ukwikatililala kuli ilya ora. Ndecetekala inshita nomba ili mupepi, pantu icintu cimo cilingile ukucitika.

<sup>153</sup> Nga kuti twapokelela fye ici Cine! Nomba mukashita fye. Nga kuti twailuka fye ifyo ili Lembo lipilibula!

“*Uyo uuli muli imwe acila uyo uuli mwi sonde.*”

Ifwe tekuti twiluke Cilya, lelo nomba tusosa ukutula twalicetekela Cena. Kabili twalishiba Cena Cine, lelo ifwe mucine cine tatwiluka Cena.

*...uwapulishamo uuli muli imwe, ukucila uyo uuli mwi sonde.*

Nani uuli muli imwe, uyo uli uwapulishamo? Ena ni Kristu, uwasubwa! Lesa, ulya uwali muli Kristu, ali muli imwe. “Uwapulishamo ni Uyo uuli muli imwe, ukucila uyo uuli mwi sonde.”

<sup>154</sup> Kanshi nga Ena ali muli imwe, tacili ni mwe nakabili mwe baleikala, ni Wene uleikala muli imwe. Mwamona? Tacili amatontonkanyo yenu, ifyo mwinga tontonkanya palwa *Ici*; cena ni cilya ico Ena asosa palwa *Ici*. Mwamona? Kanshi, nga Ena ali muli imwe, Ena mucine cine te kuti akane ifyo Ena asosele. Ena tekuti acicite. Lelo Ena kuti asunga ifyo Ena asosele, kabili Ena aleesha ukusanga ulya muntu uo Ena engaishininkishamo Umwine.

<sup>155</sup> Nomba, cilya tacilepilibula Ena alingile ukucicita ku muntu onse. Munshita ilyo Mose atungulwile abana ba Israele, kwaliko umo, ulya ali ni Mose. Bonse abashala bakonkele fye Imbila. Mwamona? Bamo muli bena balyeseshe ukwima kucipashanya, kabili Lesa atile, “Ipatule we mwine,” kabili ali ba minine fye. Mwamona? Mwamona?

<sup>156</sup> Nomba, lelo, “Uyo uuli muli imwe alipulishamo ukucila uyo uuli mwi sonde,” Lesa muli imwe, nga filya Ena ali muli Yesu Kristu. Pantu, fyonse ifyo Lesa ali, Ena apongolwele muli Kristu; kabili fyonse ifyo Kristu ali, Ena apongolwele mukati ka Lukuta. Mwamona, ulya ni Lesa muli imwe, “Uyo uuli muli imwe.”

<sup>157</sup> Te cakusunguka ifimwela na mabimbi fyali munakile Wene, ukunakila Ifyebo Fyakwe; ukunakila Ifyebo Fyakwe, pantu Cena cali Icebo cakwa Lesa ukupitila muli Wene. Ena ali umuntu; lelo Ena ali Icebo, ukulengwa mu mubili. Mwamona? Kabili ilyo Ena alandile, cali ni Lesa ukulanda ukupitila mu milomo ya buntu. Mwamona? E mulandu wine ifimwela na mabimbi... Kalenga wine, uyo walengele ifimwela kabili na mabimbi, ali muli Wene. Nomba, tontonkanyeni pali cena! Tontonkanyeni nganshi nomba, ilyo nshilaisa kuli ino nshita ya kwisala. E mulandu wine ingulu shafwile citu pa Cebo Cakwe! Cali ni Lesa muli Wene. Cali ni Lesa muli Kristu. Ingulu shali fwile citu. E mulandu wine abafwa, balya abalepilibukila ku lukungu, te kuti balale mulya, pa Cebo Cakwe! Pantu, Ena ali Icebo.

Atile kuli Lasaro, panuma ya kufwa no kununka, inshiku shine; icinso cakwe, umona, walyonaike, muli ilya ine nshita. “Lasaro, fuma!” Kabili umuntu, uwafwa, aliminine pa nkasa shakwe. Cinshi? Cali ni Lesa. Uyo wali muli Kristu ali ni Lesa. Abafwa tekuti beminine mu Mulola Wakwe. Cali ni Lesa muli Kristu.

<sup>158</sup> Ifipupu, nomba, ibukisheni, Lesa alengele ifipupu; cena mwela. Lesa alengele amabimbi; cena menshi. Lelo ilyo



Kasebanya aingile muli fyena, afilengele ukulafundauka, ku kuleta ubonaushi. Lesa alengele umuntu, ukuba abana bakwa Lesa, lelo ilyo Kasebanya aingila muli bena, mwamona, cena bwafya. Nomba, ulya ali ni Kasebanya uyo waingile mufipupu filye fyatumine cilya cikuka. Bushe Kalenga, uyo walengele icipupu, teti alose, “Bwelelamo uko nakulengele”?

Bushe ulya te Kalenga umo wine uyo waiminine pa lupili lwa Corolado ubushiku bumbi? [Ulukuta lwatila, “Ameni.”—Ka.] Mwamona?

Bushe ulya te Umo wine uyo wingasenda iciputulwa cesabi no kucimokaula, kabili iciputulwa cimbi ukubako? Ena mucine talingile ukukwata cilya. Ena ngalicosesele.

Bushe ulya te Kalenga umo wine uyo walengele utupale? [Ulukuta lwatila, “Ameni.”—Ka.] Kanshi, Uyo uwali muli Kristu ali muli ifwe, mwamona, pantu Cena cilecita imilimo imo ine Ena acitile, icintu cimo cine.

Abafwa te kuti beminine mu Mulola Wakwe, pa Cebo Cakwe.

<sup>159</sup> Lolekesheni, twalikwata amalyashi ayashininkishiwa, aya bantu “abafwa,” kabili Shikulu ukupele cimonwa, no kuya kuli bena no kubabusha nakabili. Uyu umo naikala apa, muno mwine nomba, uyo wafwile palya pene epo ena ekele palya pene. Kabili uyu ali no mweo, muno bushiku; awile mukwikatwa kwa mutina. Ulya palya umukashi wakwe, nashi. Twalile palya; ifintu fyonse fyalile, amenso yakwe tayalekapawila, kabili yalile. Uyu ali pano, uwa mweo. “Pantu uwapulishamo ni Uyo uuli *umu*, muli ifwe, ukucila uyo uli mwi sonde!” Mwamona?

<sup>160</sup> Uwapulishamo ni Uyo! Ena ni Lesa, Kalenga! Ifipupu na mabimbi fyali munakile Wene. Ingulu shilafwa icitu. Ifya cifyalilwa fyonse fyali munakile Wene, pantu Ena ali ni Kalenga uwa fyacifyalilwa. Owe, ilyo twatontonkanya cilya, cilafumyapo umwensu. Lyena tuleluka ifi fintu, mulemona. Cena ni cinshi? Cena tacili umuntu. Umuntu tekuti acite cilya; umuntu abe ciputulwa ca fyalengwa. Mwamona? Lelo cena fipupu na mabimbi ifyo finakila Kalenga. Mwamona?

Kabili cisenda Kalenga ukucicita, “Pantu Ena uuli muli imwe alipulishamo ukucila uyo uuli mwi sonde.” Ena uyo wingalenga icimfulunganya, ni uyo uuli mwisonde. Ena uuli muli imwe, ni Kalenga, Uyo walengele fipupu. Ena kuti aebaula Kasebanya ukufuma mu fipupu, kabili kwaba tondolo. Ena kuti aebaula Kasebanya ukufuma mucikuka, kabili takuli icikuka. Ena ni Kalenga. “Kabili uwapulishamo ni Uyo uuli muli imwe, ukucila uyo uuli mwi sonde.” Mwamona?

<sup>161</sup> Kasebanya ena wa mwisonde. Isonde lyakwe. Lyena lyonse lyaba ilyakwe. “Cinshi ico waponena, We Lusifa, we mwana wa macaca?” Mwamona, ili sonde lyali ilyakwe. Lilya elyo ena, atamfiwe ku Mulu, aishilebwela pali lyena. Mwamona?

<sup>162</sup> Ena ali ulya uyo wasosele kuli Kristu, “Aya mabufumu yandi, ndacita kuli yena nge fyo mfwaya.” Yena yakwe, kabili ena e uyo uuli “mwi sonde.”

<sup>163</sup> Yohane aebele fye abasambi, “Mwalyumfwa pali munkanyakristu uyo wali no kwisa, kabili ali kale pano ukubomba mu bana ba bucintomfwa. Lelo, mwe bana banono, imwe ta muli ba ili sonde. Imwe muli bakwa Lesa. Kabili uwapulishamo ni Uyo uli muli imwe, ukucila uyo uuli mwi sonde.” Ulya ni Kristu muli imwe!

<sup>164</sup> Uyo uwa—uwalengele myulu ne sonde, aishile monekela mu Buntu bwakwa Yesu Kristu; Lesa muli Kristu, ukuleta isonde ku Mwine.

Lekeni tusose imwe mutila, “Ulya ali Mwana wakwa Lesa, nangula, Munyina Branham.” Cisuma, lekeni tusange nga Ena e wa Muyayaya, Lesa uwa muyayaya.

<sup>165</sup> Uwapulishamo Uyo uwali muli Yoshua, ukucila akasuba. Kabili Yoshua ali umuntu, uwa fyelwe mu lubembu, nga imwe na ine. Kabili uwapulishamo ali Ulya uwali muli Yoshua, kabili mukasuba ako akaleenda kwi funde lyakwa Lesa. Lesa aebele kalya kasuba ukubalika no kushinguluka akene, kabili kena kalatekwa no kutungululwa ku mafunde yakwa Lesa. Lelo uwapulishamo Uyo uwali muli Yoshua, ukucila ifyo amalango yakwa Lesa yali; pantu Kalenga, Umwine, ali muli Yoshua ilyo Yoshua alolekeshe pa kasuba no kusosa, “Iwe wiminine palya pantu uli. Kabili, we mweshi, wikale palya pantu uli, mpaka mpwisha ubu bulwi.” Kabili akasuba no mweshi fyali munakile, pantu Uyo uwali muli Yoshua ali uwapulishamo ukucila a—akasuba no mweshi. Uyo wali muli Yoshua!

<sup>166</sup> Uyo wali muli Mose, ali uwapulishamo ukucila Egupt. Egupt ali impuka isha maka ishe sonde, bena balicimfishe isonde pali ilya nshita. Lelo uwapulishamo ali Ulya uwali muli Mose, ukucila ifyo Egupt ali, pantu Mose alicimfishe Egupt. Uwapulishamo ali Ulya uwali muli Mose, ukucila ifyacifyalilwa fine. Bushe mwalitala ukutontonkanya ukutila Lesa alisendele Icebo Cakwe no kupela Cena kuli Mose, kabili asosele, “Kabiye kunse kulya no kweba akasuba ukuti kebalika”? Kabili akasuba kalifitile fititi! Bushe co cishinka? Ena kuti alenga akasuba ukubalika na makumbi ukubwelelamo, atemwa Ena kuti alenga akasuba ukufita. Ena ni Lesa; Ena kuti acita conse ico Ena alefwaya, kabili Ena aba mu bana bakwe abacetekela! Ameni. Cilya eco.

<sup>167</sup> Twakwaliko no lupantila ulwa monekele. Limbi cali ni nshita ya mpepo, takuba ba lunshi, lelo Lesa atile kuli Mose,

“Kabiye uye landa Ifyebo Fyandi, kabili nkabika mu mano yobe ifya kusosa. Kabili iwe kabiye kulya no kusenda ulukungu lumu ukufuma pa mushili, no kuiposela mu lwelele, ulukungu.”

<sup>168</sup> Kabili atile, “Nakube mpatila!” Kabili mpantila shaleenda nalimo ama inch ayengi ukushika, pa mushili ponse, mu ma ora ayanono. Bushe cilya cishinka? Kalenga!

<sup>169</sup> Takwaliko bacula nangu bamo, e ico aimishe inkonto yakwe nokusosa, “Nakube ba cula!” Kabili bena bali ukuli konse, imina, mpaka impanga yonse yalenunka. Bushe co cishinka?

<sup>170</sup> Ilyo ena aishile pali Bemba wa Kashika kabili yali kuntanshi yakwe, Lesa atile, “Landa kuli Bemba.” Kabili Mose alandile kuli Bemba; kabili uwapulishamo ni Uyo uwali muli Mose, ukucila ifyo bemba ali umwine. Bushe co cishinka? Owe, mwe! Nomba, mulemona, uwapulishamo ali ni Uyo uwali muli Mose, ukucila uyo uwali mwi sonde. Uwapulishamo ni Uyo uwali muli Mose, ukucila ifya cifyalilwa fyonse ifyabamo mwi sonde. Aebele ifya cifyalilwa. Pali fyonse ifyo Lesa amwebele ukusosa, alicisosele, kabili ulya e musango caishileba.

<sup>171</sup> Ulya Lesa umu wine ali pamo na ifwe muno bushiku! Tekuba fye naifwe, lelo muli ifwe! Alishininkisha Abamuli ifwe. “Uwapulishamo ni Uyo uuli muli imwe, ukucila uyo uuli mwisonde.” Cinshi ico tuletina, isonde?

<sup>172</sup> Kuno ubushiku bumbi balisangile i—cimo icapala ilino lya cinama icitwa dinosaur, uku lubali ukushinguluka ku...Ndemona imwe bonse mwali umfwa pali cena; uku lubali ku Niagala Force. Batile, “Lyafinine ama paundi mutanda.” Natontonkenye bena bali no kusosa ukuti lyafumine ku muntu, lelo ine—ndetontankanya bena mukulekelesha bacilondolwele nga cimo icapala inama iya nshita sha kale. Shilye nama nalimo shalikele nshita imo pe sonde. Ni kwisa kuntu shili nomba?

Bushe mwalishiba, Lesa Impalume kuti alanda dinosaurs ukwisa pali ili sonde, muli ora ulekonkapo kuti fyaba ba mailoshi amakumi yane ukushika? Namwishiba, Lesa kuti aonaula ili sonde ne mpantila? Ena kuti aita mpantila. Ni kwisa uko shiya ilyo shafwa? Cinshi cicitika kuli lunshi wa munga'nda? Cinshi icicitika kufipaso? Inshita ya mpepo ilesa, kabili kulatalalisha nganshi; kabili, ukuya mu nshita ya lusuba ululekonkapo, ifipaso ukuli konse fye. Nikwisa uko fyafumine? Ena ni Kalenga uyo ufilanda mukubapo! Ena ni Lesa! Ifyacyalilwa finakila Icebo Cakwe.

<sup>173</sup> Uko abengi ba munyinefwe basansamuka, balakwata ukutontankanya ukutila Lesa aosele ukucita icintu cimo, kabili bena balasosa cili ni EFYO ASOSA SHIKULU ilyo tacali ifyo. Ulya e mulandu wine tacicitikila.

Lelo ilyo ni Lesa mucine cine ulekweba, cilingile ukucitika, cilingile ukuba muli ulya wine musango. Mwamona? Ilyo Lesa alanda cena, cilingile ukuba.

<sup>174</sup> Uwapulishamo ni Uyo uwali muli Mose, ukucila uyo uwali mu Egypt. Uwapulishamo ni Uyo uwali muli Mose, ukucila icintu conse ico Farao enga cita, fyonse ifya malele yakwe. Uwapulishamo ni Uyo uwali muli Mose, ukucila uyo wali mu ba malele. Mwamona? Uwapulishamo ni Uyo wali muli Mose, ukucila ifyacyafyalilwa fyonse.

<sup>175</sup> Uwapulishamo! Uyo wali muli Daniele ali uwapulishamo ukucila inkalamo. Ena kuti alesha shilye nkalamo isha nsala. E ico icintu conse ico cingalesha icintu icili conse, caba icapulishamo ukucila ico aleseshe. E ico inkalamo shalibutukile, ne nsala, ku kulya Daniele; kabili uwapulishamo ali ni Uyo uwali muli Daniele, ukucila uyo uwali mu nkalamo.

<sup>176</sup> Nomba, ilyo nkalamo yalengelwe mu ntendekelo, yena yali icibusu no muntu. Ni Kasebanya uyo wailenga ukucita cilya. Cilya cishinka. Mu Millennium, umumbulu kabili no mwana wa mpaanga fikamemena capamo, kabili inkalamo ikalya impimbili nge ngo'mbe ilume, kabili ikalala panshi pamo ne ngo'mbe ilume. Tafyaka cene atemwa ukonaula mu Millenium. Kasebanya takabepo. Cena ni Kasebanya uyo ulenga ifinama fya mu mpanga ukusumaula no kulepula no kulya, ne fintu nga filya, umusango ficitilamo. Cena ni Satana ucita cilya. Lelo uwapulishamo ali ni Uyo uwali muli Daniele, ukucila uyo wali mu nkalamo. Mwamona? Uwapulishamo ali ni Uyo muli ulya kasesema, ukucila uyo wali mu nkalamo.

<sup>177</sup> Uwapulishamo ali ni Uyo uwali mu bana ba ci Hebere, uwapulishamo ali ni Uyo uwali muli bena, ukucila uyo wali mu mulilo. Pantu bena baliposelwe mu mulilo; kabili Uyo uwali muli bena, ali pamo nabo, kabili alengele umulilo ukukana boca ilyo ilungu lya mulilo lyakoshiwe imiku cinelubali ukukabisha ukucila ilyo lyatalile ukukafiwapo, ukukafiwa. Cilya cishinka? Uwapulishamo ali ni Uyo uwali mu bana ba ci Hebere, ukucila uyo uwali mwi sonde.

<sup>178</sup> Palya alikele Nebucadnezza, atemwa Belteshaza. Nebucadnezza, ndecetekela ali, uyo uwa ocele ilungu lya mulilo imiku cinelubali ukukabisha ukucila ilyo lyatala ukuba. Uwaputwamo na Kasebanya, ku kusenda aba bantu, pantu baliminine pa Cebo cakwa Lesa; kabili ali baposele muli ili lungu, imiku cinelubali ukukabisha ukucila ifyo lyatala ukuba, kabili lyena tekuti nangula ukuboca. Pantu uwapulishamo ali Uyo uwali muli Shadraki, Meshaki, na Abednego, ukucila uyo uwali mwi sonde. Mucine cine! Owe, mwe!

179 Uwapulishamo ali Uyo uwali muli Eliya, ukucila ulwelele ulwa butale lwali, pantu ena kuti aleta imfula ukufuma mulwelele ulwa butale ulo lushalokele pa myaka itatu ne myeshi mutanda.

Uwapulishamo ni Uyo uwali muli Eliya, ukucila imfwa. Pantu, ilyo yaishile nshita kuli ena ku kufwa, Lesa alimwene ulyo mukote, kasesema uwanaka. Ena alyebawile Yesebele na ba penti bakwe bonse ne fintu fipya, kabili ali ngo wanaka, e ico Ena tamulekele no kwenda ku mushi, nga filya Ena acitile Enok. Alitumine celeta no kumwimya, kabili ali musendele ku Mushi. Uwapulishamo ni Uyo uwali muli Eliya, ukucila uyo uwali mu Yerusalemu na mu Yudea, kabili na mu mpili. Uwapulishamo ni Uyo uwali muli Eliya, ukucila imfwa ine. Uwapulishamo ni Uyo uwali muli Eliya, ukucila inshishi; pantu alibutwike inshishi, Ena abutwike mfwa, kabili Ena aile fye kulya ku Mushi muli celeta. Mwamona, uwapulishamo ali Uyo, kabili Ena ali muli Eliya.

180 Mwatila, “Owe, cisuma, ulya ali umuntu umukalamba.”

181 Lolela pali miniti! Baibele itila, “Ena ali muntu uyo wakwete myumfwile imo ine,” nga imwe na ine. Cilya cishinka. Lelo ilyo apepele, aceteketele apokelele ifyo apepelepo; ifyo Yesu asosele kuli ifwe, “Ilyo mwapepa, cetekeleni ukutila muli no kupokelele ifyo mwalomba, fikacitwa.” Alipepele no mukosha ukutila tailingile ukuloka, kabili yena tayalokele pa myaka itatu ne myeshi mutanda. Mwamona? Uwapulishamo ni Uyo uwali muli Eliya, ukucila ifya cifyalilwa.

182 Lyena nga palwa kundapa abalwele? Mwamona? Uwapulishamo ni Uyo uuli muli imwe, ukucila ubulwele. Mwamona? Pantu, kulya kucilinganya, ukucilinganya amafunde yene yakwa Lesa, ubulwele bwaba. Cisuma, “uwapulishamo” ni Uyo uuli muli imwe, ulya ni Kondapa kabili Kalenga, ukucila i—ukucila Kasebanya uyo uwacilinganya ubutantiko bwine ubwa bumi bwenu. “Uwapulishamo ni Uyo uli muli imwe, ukucila uyo uuli mwi sonde.” Mwamona?

Uwapulishamo ali Uyo wali muli Eliya! Uwapulishamo ni Uyo uwali muli Esaya, ukucila ifyo nshita yali; atemwa onse muli balya bakasesema, pantu bena balimwene ukuciluka pa nshita. Mwamona?

183 Uwapulishamo ni Uyo uwali muli Yobo, ukucila ne mititi ya munofu, ne mfwa kabili ne nshishi. Pantu kucimonwa amwene ukwisa kwa kwa Shikulu, kabili atile, “Kalubula Wandi wa mweo, kabili pa bushiku bwa kulekelesha Ena akeminina pe sonde; kabili nangula imititi ya mu mubili wandi ingonaula uyu mubili, nalyo line mu mubili wandi nkamona Lesa.” Mwamona? Uwapulishamo ni Uyo uwali muli Yobo,

ukucila imfwa; uwapulishamo, pantu imfwa yalyeseshe ukumusenda kabili ena te kuti acicite. Yena te kuti icicite, pantu atile, “Nkabuka nakabili,” kabili alicitile. Alicicitile.

<sup>184</sup> Umfweni, ndekabila nga twacikwata inshita ukuya pantanshi pali ici. Lelo kuti natemwa ukwipusha ilipusho, ilyo naumfwile ukulandwa ubushiku bumbi, palwa, “Kristu muli imwe.” [Munyina Branham akonkonsha pa cintamba imiku ibili—Ka.]

Nomba, mwi—mwileka cena cishintilile pa cintu cimo ico mwacita; ukusosa, “Nacumfwa ukututuma ukunono. Ine—ine—nalilandila mu ndimi. ine—nalishanine mu Mupashi.” Nshilesusha nangu cimo pali fyo, nomba. Filya fili fye bwino, mwamona, cilya ni ci, lelo mwishintilila pali filya. Mwamona?

Ubumi bwenu bulingile ukuba *Ici*. [Munyina Branham apampansha Baibele yakwe—Ka.] *Ici* e Co. Imwe ne *Ici* mulingile ukuba cimo, mwamona, elyo kabili *Ici* cilailangisha *Icine*. Mwamona?

<sup>185</sup> Nomba inga cakutula—nga cakutula muno bushiku ukuti imwe kuti mwasosa, no mutima wenu onse, ukutula umupashi wakwa Shekespeare walikele muli imwe, ukutula Shekespeare alikele muli imwe? Namwishiba ico mwingacita? Imwe kuti mwacita imilimo yakwa Shekespeare. Imwe kuti mwacita. Imwe kuti mwacita. Imwe kuti mwapanga imishikakulo kabili—kabili amangalo, na fimbipo, pantu Shekespeare ali kangala wa ulya musango, kalemba umukalamba, kalemba uwa mishikakulo. Nomba, nga Shekespeare aikele muli imwe, imilimo yakwa Shekespeare kuti mwacita. Bushe ico cishinka?

<sup>186</sup> Inga cakutula Beethoven aikele muli imwe? Inga cakutula Beethoven aikele muli imwe? Namwishiba ico mwinga cita? Imwe kuti mwalemba inyimbo kwati ni Beethoven, kamba umukalamba. Imwe kuti mwalemba inyimbo nga Beethoven, pantu Beethoven kuti aba ubumi bwenu. Imwe kuti mwaba Beethoven, mu mubili, nakabili. Nga Beethoven aikele muli imwe, imilimo yakwa Beethoven kuti mwacita, pantu Beethoven aikele muli imwe. Bushe cilya cishinka?

<sup>187</sup> Lelo Uyo uuli muli imwe ni Kristu! Kabili nga Kristu ali muli imwe, imilimo yakwa Kristu mukacita, nga Kristu ekala muli imwe. Efyo asosele. Yohane Washila 14:12, “Uyo uwacetekela muli Ine, imilimo iyo Ncita nao akacita,” nga mwali muli Kristu, atemwa nga Kristu aikele muli imwe. Kanshi, Kristu e Cebo. Bushe ico cishinka? Kabili Icebo caishile kuli bakasesema Bakwe. Mwamona? Kabili nga, imwe, Kristu aikele muli imwe, imilimo yakwa Kristu kuti yacitilwa ukupitila muli imwe, Ubumi bwakwa Kristu kuti bwaikala ukupitila muli imwe. Imilimo iyo Acitile, ubumi ubo Aikele, kabili ne fintu fyonse, kuti fyaikala muli imwe; kwati fye nga Shakespeare, atemwa Beethoven, atemwa—atemwa uyo onse fintu ali uwaikele muli imwe.

<sup>188</sup> Ngo Ubumi Bwakwe! Lelo nga mucili muleikala ubumi bwenu mwebene, lyena imilimo yenu mwebene muli no kucita. Mwamona? Lelo nga muleikala Ubumi bwakwa Kristu, nga Kristu ali muli imwe, “Uyo uuli muli imwe ali pulishamo ukucila uyo uuli mwi sonde.” Nga ifyakutwishika fyenu ne fyakukalipwa pa mabulayo yakwa Lesa fili muli imwe, lyena Kristu talimo mulya; mwamona, imwe muli fye aba bombelwapo. Lelo ngo Bumi, nga Kristu aleikala muli imwe, Icebo Cakwe Ena ali no kuciishiba kabili ubulayo Bwakwe Ena ali no kucita. Mwamona? Ali no kucita.

<sup>189</sup> “Ilyo mwapepa, cetekeleni ukutula mwapokelela ifyo mwalombelapo, kabili fikapelwa kuli imwe. Nga mwasosa kuli ulu lupili, ‘Sela,’ kabili ta mutwishike mu mutima wenu, lelo mwacetekela ukutula ifyo mwasosa fili no kucitika, imwe kuti mwakwata ifyo mwasosa. Tata alebomba, na Ine ndebomba. Mucine, cine, ndetila kuli imwe, Umwana teti acite kantu mu mwine; lelo ifyo Amona Tata lecita, filya efyo Umwana acita nao.” Mwamona? Kabili ilyo Tata alangishe Wene ifya kucita; aendele kulya ukwabula ukufilwa pa cintu conse, kabili atile, “Napabe,” caishilebapo.

Kabili ulya Kristu umu wine ekala muli imwe. Ena ekala muli ifwe. Kanshi imilimo Yakwe tuli no kucita, pantu Kristu e Cebo, kabili ubulayo ubwa Cebo buleta ukundapwa kuli imwe. Bushe mulecetekela cilya? [Ulukuta lwatila, “Ameni.”—Ka.] Mucine!

<sup>190</sup> Atile, “Nshaka mushe butunga.” Ilyo ndepepa, nacilomba panshita lyakapita, mulya muli Mateo 24, mwamona, atemwa Mateo 28:20. Mwamona? Atile, “Nkesa kuli imwe, ukuba muli imwe. Ine,” Umuntu, Kristu, mu musango wa Mupashi wa Mushilo, “akesa no kwikala muli imwe. Lyena tamwakabe palwenu—imwe tamwakabe mwebene nakabili. Nkaba na imwe. Kabili uwapulishamo ni Uyo uuli muli imwe, ukucila uyo uwaba mwi sonde.” Mwamona? AbaHebere 13:8 itila, “Aba cimo cine, mailo, ilelo no muyayaya.”

<sup>191</sup> Uyo wali muli Noah ali uwapulishamo ukucila ma bupingushi ya menshi.

Kabili Uyo uuli muli imwe alipulishamo ukucila ama bupingushi ya mulilo. Mwamona? Uyo uuli muli imwe alipulishamo, pantu Ena alipile ama bupingushi no kucimfya Ubupingushi pa mulandu wa imwe. Mwamona? Takuli umwenso palwa cena. Mwamona, imwe muli mulya. Ee.

Uwapulishamo ni Uyo uwali muli Noah, ukucila uyo wali mu mabupingushi ya menshi, uyo waonawile sonde ilyo lishacetekele. Pantu, Noah alicetekele. Kabili uwapulishamo ali ni Uyo muli ena, uyo wacetekele Wene uyo walandile kuli Ena, ukucila uyo wali mwi sonde. Ulya, Noah afulumwike

amabipingushi yonse, pantu Icebo cakwa Lesa cali icapulishamo ukucila filya. Kabili alicilwike pa mulu wa ma bupingushi.

“Uwapulishamo!” Ifyo twingekala pali cilya pakashita! Mwamona?

<sup>192</sup> Uwapulishamo ni Uyo uwali muli Dabidi, ukucila bere iyo yaibile mpanga yakwe. Uwapulishamo ni Uyo uwali muli Dabidi, ukucila inkalamo iyaishile no kusenda imo iya bana ba mpanga bakwe. Uwapulishamo ni Uyo uwali muli Dabidi, ukucila umulwani, Goliat. Umwina Pelishiti umukalamba ulyo waiminine palya, yamo amakumi yabili na fibili, ama fiti mukulepa ikumi limo na fine, ne fikumo ama inch ikumi limo na fine, pali ena; ne fumo nge nshindano lya ubila; kabili iyabikwako konse fye na fibili atemwa ama inch yatatu ukutikama, iya nshimbi atemwa icela, ubutale. Lelo ico cali muli Dabidi cali icapulishamo ukucila uyo wali muli ena.

Ena ali amaka, bakapafu. Ena ali ni mpuka. Ena kuti acita, ukwimya fye Dabidi ku mpela ya mufwi wakwe no kumukobeka pa mulu, no kuleka ifyuni ukumulya.

<sup>193</sup> Kabili Dabidi atile, “Iwe ulenkumanya ngo mwina Pelishiti, mwi shina lyakwa Pelishiti. Iwe ulentipa mwi shina lya mulungu wa mwina Pelishiti.” Kabili atile, “Iwe naukwata ukuyumfwa pafyo walacita. Kabili ulenkumanya ne canso kabili no mufwi. Lelo ndekukumanya mwi Shina lyakwa Shikulu Lesa, kabili ilelo nalaputulako umutwe obe ukufuma ku mapeya yobe.” Kabili ena alicicitile, pantu uwapulishamo ali Uyo uwaleputamo Dabidi kuli kulyo kushipa.

<sup>194</sup> Uwapulishamo ni Uyo uuli muli imwe, ukucila cilye cicinga. Uwapulishamo ni Uyo uuli muli imwe, ukucila ayo amacila. Uwapulishamo ni Uyo uuli muli imwe, ukucila ilye mpwalonda. Uwapulishamo ni Uyo uuli muli imwe, ukucila kulyo kucushiwa. Uwapuli shamo ni Uyo, ukucila icintu icili conse ico cilipo ico Kasebanya engabika pali imwe. “Uwapulishamo ni Uyo uuli muli imwe, ukucila uyo uuli mwi sonde.” Uwapulishamo ni Uyo! Ee!

Uwapulishamo ali ni Dabidi, ni cinshi icali muli Dabidi; Lesa muli Dabidi.

<sup>195</sup> Ena ali muli ifwe, ulya ni, Kristu. Ena ali kacimfya uwa mulwani onse, pa mulandu wa ifwe. Ilyo Ena ali pano pe sonde, Alicimfishe ulubembu, Alicimfishe amalwele, Alicimfishe imfwa, Alicimfishe ku mbo, Alicimfishe inshishi, kabili nombamba Ena ekala muli ifwe nga kacimfya! Ena acimfishe amalwele, kumbo, imfwa, inshishi, kabili Aishile kuli ifwe ku kutulenga abantungwa ukufuma kuli filya fyonse fintu. Kabili uwa pulishamo ni Uyo uli muli imwe, ukucila uyo uwingabika ifya bufi pali imwe. Ee! “Uwapulishamo ni Uyo uli muli imwe, ukucila uyo uli mwi sonde.”



<sup>196</sup> Ulya e musango ifi fipeshamano ficitika. Ulya e musango uo cilye cipupu calekele, ubushiku bumbi. Bushe umuntunse kuti acita cilya? Iyo, mukwai, cena teti cicitwe. Iyo naiminine kulya, ndelila, kabili yalya mabimbi ukulakunta, kabili . . .

Ni banga abali muno, abaliko kulya? Lekeni tumumone imwe ukwimya amaboko yenu. Imyeni amaboko yenu, cila muntu uwaliko kulya, kulya mu Colorado lilya pa—pali ilya nshita. Cisuma. Munyina Fred, ndemoni, eumo fye eka uwalipo, lilya. Na nacetontonkanya nalimo Munyina Mann aciba muno, lelo ena. . .Munyina, Munyina Evans, bushe taliko? Munyina Evans eko ali kulya pali ilya nshita. Ee. Cisuma. Kabili, ee.

<sup>197</sup> Moneni, bushe tacili icishinka? Bushe ulya e musango cacitikilemo? Imfula yalilekele fye, kabili ifipupu fyalikele ukupupa. Cena cali ni cinshi? Pa cebo candi? Iyo! Pantu Ena alinjebele ukucicita. Kabili uwapulishamo ni Uyo uuli muli ifwe, ukucila ifyacyalilwa fyonse. Bushe ulya te Lesa umo wine uyo wingeminika amabimbi pali bembu, ukulenga ifipupu ukubwelelamo kufifulo fyafiko? Bushe Ena te Umo wine uyo uwinga lenga akasuba ukushima, uwingalenga akasuba ukubalika? Cisuma, “Uwapulishamo ni Uyo uuli muli imwe ukucila uyo uuli mwi sonde.” Mwamona? Cisuma.

<sup>198</sup> Nomba e mulandu wine ifi fipeshamano ifya cine kuti fyacitwa, pantu cena bulayo bwakwa Lesa, “Ifintu ifyo ncita, na imwe mukacita.” Yohane Washila 14:12. Ena, Kristu, uyo uwaimike ifipupu kabili na mabimbi, ni Kalenga uwa fyena. Ena acili fye Kalenga nganshi nge fyo Ena ali lilya. Ena aba cimo cine mailo, ilelo, no muyayaya.

Alyundepe abalwele no konaula ulubembu, no kufipilibula fyonse pa mulandu wa imwe, kabili aishile kuli imwe pakutila Ena engekala muli imwe. Alicimfishe fyonse ifi, ku kwisa no kwikala muli ifwe. Ena ni ulya Kacimfya uyo wacimfya kale ifi fintu; alicishininkisha mu Malemo, alibwelele no kucimfya ifintu fyonse, no kushininkisha kuli imwe ukutila Ena ni Lesa umo wine. Kabili panuma ya myaka ikana limo ne myanda pabula, [Munyina Branham akokonsha imiku ine pa cintamba—Ka.] pano Ena acili alecita icintu cimo cine mukati kesu ico Ena acitile lilya, ukutila acimfishe imfwa, kumbo, amalwele, kabili ne nshishi!

<sup>199</sup> Uyu Kristu, uyu “Ena,” Ena ni Uyo uuli muli imwe. Ena ni Kristu. Nge fyo Yohane asosele, “Uyo uuli muli imwe alipulishamo ukucila uyo uuli mwisonde.” Ulya ali ni Kristu! Ena alipulishamo kucila isonde lyonse pantu Ena acimfishe sonde, kabili e wapulishamo, ukucila ifintu fyonse, pantu Ena alitucimfhishe lyena. “Kabili tuli abapulamo paba cimfya ukupitila muli Wene uyo watutemenwe no kuipela Umwine pa mulandu wa ifwe,” pa kutila Ena enga

bwela no kucita imilimo Yakwe ukupitila muli ifwe, ukushininkisha kuli ifwe ukutula Ena aba cimo cine mailo, ilelo, no muyayaya.

Ilyo Ena ali pesonde, alishininkishe ilyo Ena aiminine pakati ka bantu, Ali ni Mesaya. Ena kuti alingulula amatontonkanyo ayali mu mitima yabo. Kabili Baibele itila, Mose alisosele, ukutula, “Ena akaba kasesema.” Bushe co cishinka? Alishibe inkama sha mutima. Alishibe ifyo abantu bali. Alishibe ico cali icalubana na bena. Bushe twalimona cilya ukucitwa? [Ulukuta lwatila, “Ameni.”—Ka.] inshita ne nshita!

<sup>200</sup> Twalishiba ukutula abafwa balibushiwa, ukufuma fye ku mfwa. Bamo muli bena balifwile akasuba konse na hafu. Cisuma, alifwile ulucelo lumo, kabili balimuletele ilya nshita ya bushiku, no kwenda inshita yonse iya bushiku; kabili ubushiku bwa konkelepo nalimo mu cungulo, atemwa panono fye panuma ya cungulo, bali muletele kulya ukwali tenti. Akanya akanono akafwa, akatalala, kabili akalambalala mu maboko yakwa nyina. Kabili Shikulu Lesa aletele, alandile Icebo ca Mweo, kabili kalya kanya kalikabile, no kutendeka ukulila; kabili nalikapele mu minwe yakwa nyina.

<sup>201</sup> Mrs. Stadklev, aliminine palya ukumona cilya ukucitwa, ulya e mulandu wine alilile nganshi pa kanya kakwe, alefwaya ine inje mundeke ku Germany. Lelo Shikulu atile, “Kulya kuboko Kwandi; wiesha ukwebaula cilya.” Mwamona, uleshiba bwino.

Ilyo Ena aebele Mose, atile, “Landa kuli cilye cilibwe,” wicuma. Cilya capilibwile “Landa,” wicuma, mwamona. Imwe mulingile ukunakila ifyo Ena asosa ukuti cita. “Lelo takuli umuntu uwingacita kantu mu mwine,” ena alingile ukumfwa cena intanshi ukufuma kuli Lesa.

<sup>202</sup> Nomba Icebo cakwa Lesa calilaile ukutula Ena wa mweo. Kabili, pantu Ena wa mweo, muli ba mweo. Alilaya, cilya, “Imilimo iyo Ncita na imwe mukacita. Ifintu fimo fine, ifingi ifya cena, mukacita, pantu ndeya kuli Tata.” Alicimfishe ifintu fyonse. Ena ni Ulya waminike. . .

Ena e Ulya uwapangile tulyo tupale. Cilya cacitike imiku ibili. Cacitike umuku umo ku ncende yobe, Charlie. Kabili calicitike—calicitike kuno lubali ilyo, ba munyina, Munyina Fred na Munyina Banks na bena kulya lubali pamo na ifwe.

<sup>203</sup> Calicitike mu Germany, ilyo balya ba manga ikumi limo na basano, cila lubali kuli ine, batile. . . Pantu Billy na Munyina Arganbright tekuti babasuminishe— ukubasuminisha ukumona ine, elyo asosele, “Cisuma, twalalenga lilye tenti ukonaika.” Kabili balikele kulya, ne fya malele yabo, no kwita pa mulungu wabo, Kasebanya, kabili uyu alishile ne cikuka. Nalimo amakana amakumi yatatu, ba Germany amakana amakumi yane kulya, kabili lilye tenti ukulaima pa mulu na panshi nge *fi*.

Bena, elyo ukuputula, basendele shisala no kuputula isako, kabili no kuisonta kunuma nga *filya*. No kulasosa kulya, ukupita muli fyonse ifya malele yabo, no kulasosa ifyebo fitatu ifya mushilo ifyo basosa, “Tata, Mwana, na Mupashi wa Mushilo; lu-lu-lu-lu-lu! Tata, Mwana, na Mupashi wa Mushilo; lu-lu-lu!”

<sup>204</sup> Ukulaya nga filya, kabili mucine icikuka calishile. Mucine. “Ena ni cilolo uwa maka aya mulwelele,” Satana. Kabili bena balitile icikuka. Kabili, nomba, nangula lilye tenti ilikalamba ukwikala nga filya, owe mwe, yena kuti yafimba umudada uwa musumba; kabili lyena lyakulilwe, lyakulilwe muli fibili na muli fine, kabili ifimatenti fye ukubikwa pali lyena. Icipupu caishile ingila mukati mulya no kuli mya fye, nga *filya*. Kabili cilye cipupu, nakalumba ukulabyasha nga filya, ine nalitwalilile fye ukulashimikila.

<sup>205</sup> Kabili, owe, bena baleya fye mufya malele ayakulu, ukulaya fye no kuya fye nga filya, ukusosa filye fyebo ifinono ifya mushilo batile, “Ifyebo fitatu ifyapulamo ifya mushilo: Tata, Mwana, na Mupashi wa Mushilo,” kumbali shonse shibili nga filya. Elyo nalimwene ukufukama, nashingulukwa ne fiwa kulya, lelo tali uwakakwa.

<sup>206</sup> Kabili natile kuli Munyina Lowster, “Wiesha ukwilula ici.”

<sup>207</sup> Natile, “Munyina Arganbright pepa fye.”

<sup>208</sup> Natile, “Shikulu Lesa, Kalenga wa myulu ne sonde, Imwe mwalintuma kuno. Nalibika ulukasa lwandi pali ili loba lya German, mwi Shina lyakwa Yesu Kristu, pantu Imwe mwalintuma kuno. Kabili lilye kumbi talikwete amaka pali ine. Teti licite, pantu ninsubwa no kutumwa kuno kwi pusukilo lya aba bantu.”

“Ndekweba, mwi Shina lyakwa Yesu, ufumepo pano.”

<sup>209</sup> Kabili ifibulumo, ukulalila, “Bang! Bang! Bang!”—fyaile “grrrrrrrrr,” kabili fyalisalangene, kabili palya pene fye pa mulu we tenti, calipokele; kabili akasuba kalibalike.

<sup>210</sup> Mukati ka ma miniti ikumi, kwaliko nalimo amakana ikumi ukushinguluka ifipailo ne fintu, ukulilila uluse, ukumona amaka yakwa Lesa. Cinshi? “Uwapulishamo ni Uyo uuli mulii imwe, ukucila uyo uli mwi sonde.” Mwamona?

<sup>211</sup> “Uwapulishamo ni Uyo uli muli imwe, ukucila uyo uli mwi sonde.” Mwamona ifya kucushiwa mu cintu, owe, munyina, nkashi, tatukwete ukusakamana nangu kumo nakalya. Uwapulishamo ni Lesa, kabili Ena ali muli imwe. Bushe mulecetekela cilya? [Ulukuta lwatila, “Ameni.”—Ka.]

<sup>212</sup> Nomba nincila pa nshita. Yena ma miniti ikumi na fisano, nalimo, panuma ya naini. Kabili ninjishiba aba bantu nabakwata ubulendo ubutali ukwensha.

Natukontamike imitwe yesu mukashita fye.

<sup>213</sup> Mwe Lesa Tata, Imwe mwalishiba palwa Colorado. Mwalishiba filye fintu fya cine. Kabili ndesosa fyena ku bukata Bwenu, pakutila aba bantu bengeshiba. Panuma ya kushininkisha konse uku kwa science, ukwa fikope, kabili ne milimo iya Mupashi wa Mushilo. Kabili, Shikulu, Imwe mwalishiba ukutila Ena... ukutila ninanda palwalala ku bantu, kabili lyonse ndacita, ukutila cena ni pamulandu Imwe mwalicilaya. Kabili Imwe muli muno, ukweshwa ukusanga umuntu umo uo Imwe mwinga ishininkishishamo Mwebene, kukuleka bambi bamone ukutila Muli aba mweo, kabili Mwaba cimo cine mailo, ilelo, no muyayaya. Ndepepa kuli Imwe, Shikulu, ukuba no luse, kabili ukututungulula no kutusotelela mu matontonkanyo yesu.

<sup>214</sup> Kuliko abo abekele muno abali abalwele kabili no kucushiwa. Kuliko abo nalimo bena limbi kuti bafwa nga tabalepoka ubwafwilisho ukufuma kuli Imwe. Abengi muli bena, nalimo, bali kumpela ya musebo, uko ama doctor te kuti babafwilishe nakabili. Imwe ni mwe Lesa, kabili Imwe mwaba cimo cine mailo, ilelo, no muyayaya. Kabili Umulola Wenu uli muno.

<sup>215</sup> Kabili, Shikulu, tatwaishiba ifyo uku Kutinta kwa Citatu, ngefyo tusotelele kuli Cena, cili no kuba. Nshishibe ni cinshi. Lelo natwishiba icintu cimo, ukutila ukutinta kwa Ntanshi kwali ukupwililika. Ukutinta kwa Cibili, ukuba fisano, cali nkumbu.

Kabili, Lesa, ndepepa muno bushiku ukutila Imwe mwalaisokolola Mwebene kuli ifwe, ukutila panuma ya ifi fintu, ukusosa, "Uyo uuli muli imwe!" Kabili Imwe mwalisosele, "Imilimo iyo Ncita na imwe bene," kabili atile Imwe tamwacitile kantu mpaka Tata Amulangisha.

<sup>216</sup> Kabili tulemona ifyo Imwe mwacitile ilyo Imwe mwali abalinga ukweba Umutumwa Petro ifyo ena ali, ifyo ishina lyaba wishi lyali. Mwaebele Natanele ifyo umulimo wakwe wali, ifyo aishileba kulya, kulya uko ali akale, ifyo ena acitile. Mwaebele umwanakashi, pa cishima, pa membu shakwe kabili ne fyo ali, ukwikala mu bucende na ba baume mutanda; basano ali bakwetepo, kabili umo e waleikala nankwe nomba tali umulume wakwe. Imwe mucili Lesa umo wine. Mwalyebele. . .

<sup>217</sup> Cali imibele yakwa Batimeo impofu, ilyo aiminine palya; lelo nomba, mu mutima wakwe, alikwete ukumona, ukutila ena kuti alolekesha; ukutila, nga ulya ali ni Yehoba ukumonekela mu Bwana bwakwa Yesu Kristu, ukutila Ena ali uwalinga ku kwishiba ku kubilikisha kwakwe. Kabili alibilikishe, "We Mwana wakwa Dabidi, mbelelo luse!" Kabili cali mwiminike Imwe, kabili Imwe mwalipilibwike no kumundapa, Mwe Tata, ukumweba ukutila icitetekelo cakwe na cimupususha.

218 Ulyo mwanakashi umunono uwalepwilwa umulopa, ukutila ukupitila muli uku kusuuma kwa mulopa no kupilibulwa kwa bumi, kabili pa myaka ingi tekuti uleke. Aliposele ndalama shakwe shonse kuli ba shinga'nga, kabili takuli nangu umo uwa mwafwilishe. Alishile ku kulongana Kwenu kuno ilyo Mwalelanda ku mwaume kulya ku—ku Galili, nge fyo Imwe mwali mu nshila Yenu ukuya ku nga'nda yakwa Jailos. Uyu mwanakashi umunono alisosele mu mutima wakwe, ukwabula ne Lembo kunuma ya cena, “Nga kuti nakumya fye ilaya Lyakwe, ine—ndecetekela ukutila nalalengwa ukuba umutuntulu.” Kabili ena alipokelele ukukabila kwakwe ilyo akumishe ilaya Lyenu. Kabili imwe mwalimwebele ukutila icitetekelo cakwe calicitile ci, alilondolwele ukukabila kwakwe, kabili mwali mulengele ukuba umutuntulu.

219 Balitweba mu Cebo ukutila Imwe ni mwe Shimapepo Mukalamba, uyo waikala mu Mulu, lyonse ukucito kupapatila. Kabili—kabili nacimbi ukutila Imwe, ukuba Shimapepo Mukalamba, pali iyi nshita, uyo uwingakumishiwa ku fyakumanama fyesu. Shikulu Lesa, peni ukutila cila muntu muno ino nshita ya bushiku limbi. . . akwate shuko ilya ku kumya Imwe muno bushiku, Shimapepo Mukalamba uwapulamo, no kulengwa umutuntulu. Ku Bukata bwakwa Lesa, nalombe ifi mwi Shina lyakwa Yesu. Ameni.

220 Nomba nshicita. . . Bushe pali ama kadi yakupepelwako? Ine—naceba Billy iyo. . . bushe pali umuntu ukwete amakadi ya kupepelwako? Cisuma, cilya cishinka, nacimweba ukukana yapela. Nacitontonkanya nalimo kuti nakwata itali, nge fyo ine. . . owe, ndelanda sana. Lelo, lolekesheni, mwamona, kabili imwe na munjeba, ilyo nacisosa, “Nalaesha pa eight sate,” imwe mwaciseka, kabili ine—nacishiba ico mwacilandapo. Ine—ndi. . . lelo ine—nali mutemwa. Mwamona?

221 Cinshi, ico ndeesha ukucita, lyonse nalyesha ici, mwe banandi; pekaba umuntu uwakusosa, “Munyina Branham acitile ici.” Munyina Branham teti acite akantu. Mwamona? Cena ni Yesu Kristu. Kabili Ena uuli muli ine ali muli imwe. Imwe mulingile fye ukucetekela. Bushe cilya te cishinka? Mwamona? Uyo uuli muli imwe alipulishamo ukucila ubulwele bwenu.

222 Nomba ni banga abantu abali muno abalwele mu mibili yabo, tamwanjishiba, lelo na mucetekela ukutila na mukwata icitetekelo icalinga ku kumya Shimapepo Mukalamba, imyeni ukuboko kwenu, musose, ni ncicetekela”? Cisuma. Owe, kuliko mu butuntulu ukuli konse, amaboko. Cisuma. Ni banga muno abo abanjishiba, kabili mwalishiba ukutila nshaishiba nangu cimo pafyo mulekabila, kabili mulefwaya Lesa ukumukumya? Imyeni ukuboko kwenu. Mwamona? Mwamona? Cisuma.

223 Mucishinka, tamuli nangu umo muno uo njishibepo palwa cintu icili conse, pali ino ine nshita, ukubo mulwele. Kano fye uyu mulumendo uwikele apa, nalimwishiba. Nali mupepelapo, inshita ishingi. Teti ntontonkanye ishina lyakwe, lelo ena afuma mulya mu Kentucky. Alanembela ine inshita yonse, umunabo uwakwa Munyina na Nkashi Woods na bena, kabili alesa kulya. Kabili ena alisangwako mukulongana pa itali, inshita itali. Ulya e muntu fye eka naishiba.

224 Nomba, Munyina Duch, ukulingana nge fyo njishibe, ali fye bwino, nga te ifyo nga tekele muno. Ena alilwele nganshi ubushiku bumbi, kabili Shikulu ali mundepe.

225 Nshaishiba *uyu* muntu. Kabili nshaishiba nani uyo ukwete ifinkonto ifi pano; nalimo ulyo muntu mu cicinga. Ine—nshishibe.

Kabili ine—nalishiba mwe bengi imwe. Lelo Lesa uwa mu Mulu naishiba, pali ino nshita, nshishibe ico mulefwaya. Nshikwete ilyano. Cili nge cakosa muno mu tabernacle, pantu, mwamona, nalishiba abantu abengi.

226 Nomba ici pano e fyo cili. Ilyo mwaya ku cifulo. . . Nomba, ndesa kuno, inshita shimo kabili ntila, “Cisuma, twalapela cila muntu ikadi lya kupepelwapo no kubatantika. Ukwisa kula kuntanshi.” Umo muntu ali no kuya. . . Nomba imwe tekuti mucite. . .

Nomba, mwe banandi, nalaisula umutima wandi no kumweba icintu cimo. Imwe tekuti mufise cilya. Pa fyo muletontonkanyapo, ni ncishiba. Cilya cishinka. Ninjishiba ico muletontonkanyapo. Mwamona? Kabili inshita shimo mutila, “Munyina, nalicetekela.” Cinshi, cisuma, walicetekela ukufikapo. Mwamona? Mwamona? Ninjishiba.

227 Kabili pano pene fye, cisuma, nomba, ino ine fye nshita, ukusubwa kuleisa fye pali ine, mulemona. Kabili kuti naumfwa fye kulyo kwenda, kwati, ukutunta, mwamona, ukutunta ukufuma mufifulo ifyapusana pusana. Mwamona?

Lelo nomba mwiesha—mwiesha nakabili ukukana cetekela. Cetekeleni Imbila yonse. Cetekeleni Cilya. Ngatacili, nga tacili icalembwa muli Baibele, lyena mwicicetekela. Lelo nga Cena cili muli Baibele, lyena Umupashi wa Mushilo uyo wikala muli ifwe ali no mulimo uwakubomba cilya nga twacetekela Cilya. Bushe co cishinka, [Ulukuta lwatila, “Ameni.”—Ka.]

Ninjishiba cintu cakosa. Mwamona, takwaba nangu cimo icisa mu nshila iyayanguka.

228 Cali icakosa kuli Wene ku kufwa, pakutula ici cingaletwa kuli imwe. Cali icakosa kuli Wene ukuya ku Kalbale; Ena alefwaya ukwikala, icakutula mpaka Ena abilikishe, “Te bufwayo Bwandi, lelo Ubwenu bucitwe.” Mwamona? Mwamona? Ena talefwaya ukuya; Ena ali Umulumendo, kabili

Ena alikwete ba munyina Bakwe. Alibatemenwe nge fyo natemwa imwe. Lelo Ena—ena tekuti abe no mweo, na bena ukuba no mweo nabo, e ico Ena alifwile pa kutila twingaba no mweo. Cilya tali icaanguka. Ena alicicitile. Lolekesheni umusango wa mfwa iya ku ntanshi Yakwe, “Tata, inshita naisa, kabili bushe mpepe ukutila Imwe musende ulu lukombo ukufuma pali Ine? Iyo.” Ena talefwaya ukucita cilya; Ena alefwaya ubufwayo bwakwa Lesa ukucitwa.

229 Nomba, lolekesheni, nga mwala cetekele cilye cintu cimo cine! Nomba, mwiesha—mwiesha—mwiesha ukucitwishika Cena, nakalya. Cicetekeleni fye. [Munyina Branham akonkonsha pa citamba imiku ingi—Ka.] Imwe mucicetekele fye. Mwitwishika. Mucicetekele fye.

230 Nga naleta abantu umu mu mulongo wa kupepelwa, kabili natila, “Cili fye bwino, nomba uyu muntu, namwishiba nshakwishiba iwe.”

231 “Iyo, cilya cishinka, Munyina Branham.”

232 Lyena kulya kwine fye uli no kwikata umuntu umo uyo uli no kusosa, “Uh-huh, lelo ena alebelenga ifyo babikile pe kadi lya kupepelwako! Ukubelenga amano!” Cena mucine cili no kucicita.

233 Elyo ndi nokusosa, “Cisuma, nomba pa Mulungu tatwakapele amakadi yakupepelwapo. Ndefwaya umuntu onse muno, uyo uli umweni, uyo ushatalile ukuba muno, imwe iminineni.” Mwamona? Kabili—kabili elyo Umupashi wa Mushilo uli no kupilibuka no kulingulula cilya icali muli bena. Mwamona? Bushe co cishinka? [Ulukuta lwatila, “Ameni.”—Ka.] Imwe mulecimona mu mbali shonse.

234 “Owe, cisuma, kuliko icintu cimo icalubana na cilya.” Mwamona? Mwamona? Kulya, takuli inshila nangu imo, imwe—imwe—teti mucicite... Mwamona, ilyo lyonse Satana enga kwata apakwikala, ena akamulenga fye imwe ukucetekela fye icintu icili conse.

Kabili ena akamulangisha icilubo icili conse ico nakwata, kabili nalikwata ifingi ifya fyena ifyo enga mulangisha. Lelo mwilolekesha kuli cilya! Mwilolekesha kuli cilya. Ndi muntu. Mwamona? Lelo, ibukisheni, ici Cebo cakwa Lesa e Cine, kabili ndeesha ukwikalila Cena.

235 Nga naya kunse uku no kutendeka icintu cimo icalubana, ico cishili icalungama, ukubembuka, no kunwa, kabili, atemwa ukupepa fwaka, atemwa—atemwa ukucite fintu ifyo fishilii fyalungama, imwe—imwe mukese no kunjikalika panshi, pantu cilya—cilya taciweme. Ine—ndefwaya lyena ukusha isonde. Nshilefwaya... Ndefwaya ukufumapo ilyo cilya tacilacitika. Mwamona? Nshilefwaya ukucita cilya.

<sup>236</sup> Lelo ilyo lyonse ndeesha ukwikala cilye cili icalungama no kucita cilye cili icalungama, mwamona, kabili ukweshwa ukwikala nge fyo Umwinakristu alingile ukucita, elyo kabili ukuleka Lesa ukusenda Icebo Cakwe nokungu'mfwa ukwiminina pali Cena. Nangula Cena cikalenga ine ukulufya abanandi abengi no kulumbukwa kwe sonde, ne fintu nga filya, kabili no kupatwa ku bengi, ne filonganino, ukutamfiwa, nalyo line ndefwaya ukubo wacine kuli ici Cebo. Cena Cebo cakwa Lesa, kabili nalitemwa Lesa. E ico cena Cebo cakwa Lesa, kabili ine—ndemweba cilya, “Ena aba cimo cine mailo, ilelo, no muyayaya,” kabili Ena ali muli ifwe nombamba. Kabili nga i . . .

<sup>237</sup> Nombamba, ngo bumi bwaka Shakespeare bwali muli ine, ukwikala muli ine, nga Shakespeare aikele muli ine, bushe tekuti ncite imilimo yakwa Shakespeare? Nga Beethoven ali muli ine, bushe te kuti ncite imilimo yakwa Beethoven? Ngo mupashi wakwa Dillinger wali muli ine, nga John Dillinger aikele muli ine, bushe tekuti mbe John Dillinger? Nga Beethoven ali muli ine, kuti naba Beethoven? Mwamona? Nga Castro ali muli ine, kuti naba Castro? Mwamona?

Kabili nga Yesu Kristu ali muli ine, imilimo Yakwe ndi no kucita, pantu ni Wene. Kabili bushe Ena tasosele ukutula icintu cimo cine cikesa citika? Mwamona? [Ulukuta lwatila, “Ameni.”—Ka.]

<sup>238</sup> Nombamba ni cinshi ico Enga cita nga Ena aliminine pano, nga Ena aba cimo cine mailo, ilelo, no muyayaya? Ena kuti asosa, “Ine kuti nacita fye ifyo Tata Anangisha ukucita.” Bushe co cishinka? Cisuma, ulya e musango Ena acitilemo mailo.

Nombamba bushe Ena aba cimo cine? Inga pa malwele? Umutengo wenu walilipilwa kale. Cila umo muli imwe alyundapwa kale kubulwele bwenu. Bushe co cishinka? [Ulukuta lwatila, “Ameni.”—Ka.] Pali cilya . . . Cila umo muli imwe alibelelwa uluse, lelo mulingile ukucisumina. Cila umo muli imwe alyundapwa, lelo mulingile ukucisumina.

<sup>239</sup> Nombamba, ukushininkisha ukutula Ena aba cimo cine mailo, ilelo, no muyayaya. Nga Ena aliminine pano, Ena tekuti amundape, nakalya. No kukana cetekela kwenu. Imwe mulingile ukucicetekela, umusango umo wine nge fyo mulingile ukucicetekela ino ine nshita. Cena cilingile ukuba cimo cine, mwamona. “Pantu, imilimo iyapulamo Ena tekuti acite mu bushiku Bwakwe, pa mulandu wa kukana cetekela kwabo.” Bushe co cishinka? Imilimo iyapulamo Ena tekuti acite ilelo, pa mulandu wa kukana cetekela.

<sup>240</sup> Nombamba, ninani uyo uwingalandila kabela *cilya*? Lesa. Nani uyo uwasosele *ci*? Lesa. Nani uyo uwacitile *cilya*? Lesa. Nani ulya uwasosele uko bere, na na sele, karibu, fyonse ifi fintu fimbi, kabili fyena cinelubali . . . Fyonse—fyonse ifi fintu



ifyacitike? Nani uyo uwasosele cilya? Ena, Kristu, uuli muli ifwe, ukuisesemena Umwine ukupitila muli ifwe, ukuisokolola Umwine ukutula Ena aba cimo cine mailo, ilelo, no muyayaya.

Nani uwaiminike ifipupu? Nani uwalengele utupale? Ulya Wine uyo walengele sukusuku wakwa Abraham, ilyo Yakwe. . . amwitile Wene “Yehoba-jire.” Yalya mashina ayengi aya kulubula nalyo line ukubikwa kuli Wene. Ena acili Yehoba jire, “Shikulu kuti aipela Umwine Ilambo.”

<sup>241</sup> Nomba, cila umo muli imwe, ine—ndefwaya ubufumacumi bwenu ubwine bwine nomba. Nga imwe muli mucine ukucetekela ne mitima yenu yonse, takwabeko umuntu umulwele mukati kesu, ilyo inshita ilye nkoloko ileisa ku maminiti yasano na yambi. Tamwabemo umuntu muno lelo uyo walaima fye pa nkasa shakwe, umutuntulu, nga mulecicetekela. Bushe kuti mwacetekela?

<sup>242</sup> Nomba lekeni fye tumone nomba nga Ena ali no kwisa kuli ifwe no kuisokolola Umwine, ilyo tulekontamika imitwe yesu.

<sup>243</sup> Shikulu Yesu, nomba Imwe ngafwilisheni. Kabili nalanakila Imwe, Shikulu, mu musango onse uo naishibilamo. Mbeleleni uluse ku membu shandi nama mpulu. Nalombela ici mwi Shina lyakwa Yesu. Ameni.

<sup>244</sup> Nomba tusende ulu lubali pano, umo muntu muno. Cetekela, kwate citetekelo, witwishika! Umo muntu uyo usha njishiba, nga cingacitwa. Teti nsose uko icimonwa cilya. Ningile fye ukulolekesha Cena. Kabili nga Cena cilecita cilya, lyena ulacishiba, nga cakutula cishinka atemwa iyo. Imwe cetekeleni fye, kabili mwitwishika. Nga Wene ali no kucicita, bushe mwalacetekela, mwamona, panuma ilyo ifi fyonse fyacitwa ilelo? Mwamona? Sumineni fye ukundapwa kwenu, mwamona. Soseni, “Shikulu, ine nomba ndekumya Yesu Kristu. Ndecetekela.” Nomba lekeni Lesa uwa ku Mulu acipele.

<sup>245</sup> “Uwapulishamo ni Uyo uuli muli imwe, Kristu, ukucila uyo uuli mwi sonde.” Nomba, mukulongana, uko ifwe tu Mukumya, Ena alailangisha Umwine mukubwekesha; nge fyo umwanakashi akumishe Lesa, ukupitila muli Kristu, kabili alangishe ukubwekesha ifya kukabila kwakwe.

<sup>246</sup> Nimona nomba mulya mucifutu pano, cilemoneka kwati cena muntu, ena mulwele nganshi. Iyo, teo. Cena mwanakashi ulepepela umwaume, kabili umwaume tali muno. Lelo cena mwanakashi. Nimona ulya ulya umwanakashi. . . Bena ni ba wishi—bakwe, kabili bena balefwa ne mpwalonda. [Munyina Branham aleka—Ka.] Kabili balwele nganshi. Umwaume tali muno. Ena ali ku ncende imbi. Cena te cino calo, ntile. Cena cili, ena ali mu Georgia. [Munyina Branham aleka.]

Twalilileni fye ukupepa. Mucetekele fye no mutima wenu onse nomba? [Ulukuta lwatila, “Ameni.”—Ka.] Twalilileni fye ukupepa, mwamona.

Ishina lya mwanakashi, ulepepa, ni Mrs. Jordan. Ena tafuma ku Georgia. Ena afuma ku North Carolina. Nga cilya cishinka, na mayo, iminina pa nkasa shobe. Cisuma, cena cishinka. [Nkashi atila, “Natotela Lesa! Natotela Lesa!”—Ka.] Bushe wacilapepela pali filya? [“Ee, mukwai; batata.”] Cisuma. Cisuma. [Nkashi atwalilila ukulanda pali ba wishi.]

Bushe ulecetekela, cilya, “Uyo uuli muli imwe alipulishamo ukucila uyo uuli mwi sonde?” [Nkashi atila, “Ndecita.”—Ka.] Bushe ulecetekela ukutula Ena ulya . . .

<sup>247</sup> Lolekesheni, ici cimo icintu na cimbi. Iwe walikwete ukusambilishiwa ukukalamba mu nshiku shobe isha ntendekelo, atemwa icintu cimo cimbi, pantu cilemoneka kwati uli uwasankanishiwa atemwa mu musango umbi uwa Bwinakristu. . . Bushe bawiso te bakapyunga, atemwa umuntu umo nga filya, bamo abantu bobbe, atemwa icintu cimo? [Nkashi atila, “Umulume wandi.”—Ka.] Umulume, ulya eo. Ndemona umuntu umo naiminina kulubali lobe, aleshimikila Imbila nsuma, kabili iwe wali mu chalichi. Ali kumako kuli iwe. [“Shikulu alumbanishiwe!”] Cisuma, mwacimone co.

Nomba, na mayo nshamwishiba, lelo Lesa alishiba umwanakashi.

<sup>248</sup> Nomba, bushe naukwata icintu cimo mwitumba lyobe, akatambala kamo akanono atemwa icintu cimo mulya? Cisuma, kanshi iwe pla- . . . Ilyo waikala panshi, bika indupi shobe pali kalya katambala, kabili witwishika, kabili Ena Uyo uli muli iwe alipulishamo ukucila uyo uleipaya bawiso. Cetekela no mutima obe onse, cili no kuba ifyo fine nge fyo wacetekela.

<sup>249</sup> Nomba, ndefwaya ukumipusha icintu cimo. Nsha mwishiba ulyo mwanakashi. Ukulingana nge fyo naishiba, ilya e nshita ya kubalilapo, ndemona, natala ukumumonapo. Lelo naikala palya mu mibele ya kupelelwa, alepepa. Kabili Lesa wine uyo wingapilibuka no kweba umwanakashi pa kusuma kwakwe ukwa mulopa, ni Lesa umo wine uuli muno, ukulangisha ukutula Ena uuli muli imwe na cimfya isonde. Mulecetekela? [Ulukuta lwatila, “Ameni.”—Ka.] Nga na mukwata fye icitetekelo, mwitwishika.

<sup>250</sup> Ukulanda pa mpwalonda, ni mona icinshingwa icafita nakabili. Cili palya pa mwanakashi, naikala *apa* pene. Ena nakwata impwalonda pa mukolomino, kabili ali mu musango uwabipisha. Kabili ena ali pepelwapo, kabili aleesha ukupokelela ukundwapwa kwakwe. Mrs. Burton, nga kuti wacetekela! Nsha mwishiba umwanakashi. Lelo ngawalacetekela no mutima obe onse . . . Mucine, icintu . . .

Leka nondolole ici kuli iwe, ico uleesha ukucita. Ishiwi lyobe nalikoma, ukufuma kuli ena, kabili iwe uleesha ukupepela pe shiwi lyobe ukubwela nakabili. Bushe co cishinka? Sokonya ukuboko kobe nge *fi*. Nomba, umwanakashi

mweni kuli ine. Nshamwishiba. Uku mumonapo? Cilya cishinka. Ee, ulya ali palya. Mwamona? “Uwapulishamo ni Uyo uuli muli imwe, icitetekelo ico cinga kumya Wene, ukucila Uyo uuli mu mukolomino obe.”

Mulecetekela no mutima wenu onse? [Ulukuta lwatila, “Ameni.”—Ka.]

<sup>251</sup> Nkashi Larsen, nshakwiishiba. Emwine wa ncende njikalapo. Lelo, Nkashi Larsen, iwe wali kuli doctor atemwa icintu cimo, icintu cimo cimbi. Wali kulya mukutumbulwa. Cilya cishinka. Bushe cilya te cishinka? Uwapulishamo ni Uyo uuli muli iwe, Nkashi Larsen, ukucila uyo uuli mwi sonde. Yesu atile, “Nali umweni, kabili imwe mwali Nsungile. Ilyo lyonse ilyo mwacitila abacepesha muli aba, abacepesha Bandi, mwacitila kuli Ine.”

Mwe Shifwe uwa mu Mulu, beni aba luse!

<sup>252</sup> Cinshi ico uletontonkanya? Iwe uleya mukutumbulwa, na iwe. Uli mweni kuli ine. Bushe co cishinka? [Nkashi atila, “Ee.”—Ka.] Iwe taufumine kuno. [“Nalikwishiba, lelo iwe tawanjishiba.”] Iwe walinjishiba, lelo ine nshakwishiba. [“Iwe tawanjishiba.”] Lelo Lesa alikwishiba. Ulecetekela cilya? [“Ee, ndecita.”] Iwe uleya mukutumbulwa. Iwe tawikala kuno. Iwe wa ba mupepi na Bedford, Springville, icintu cimo nga filya... Kulya eko wabelela, Springville. Mrs. Burton... Iyo, iyo, njelelako, nshacipilibula cilya. Mrs. Parker, lilya e shina lyobe. Bushe talili? Uwapulishamo ni Uyo uuli muli iwe, ukucila uyo uleesha ukukwipaya. Bushe co cishinka? Bushe ulecetekela no mutima obe onse? Lyena iwe tawakabile ukutumbulwa, nga wacita.

<sup>253</sup> Cinshi ico uletontonkanya pali ifi fyonse, nkashi? Nshakwishiba. Iwe uli mweni kuli ine. Ulecetekela ukuba kasesema Wakwe? [Nkashi atila, “Ndecitetekela.”—Ka.] Ulecita. Natotela. Lesa ali no kucindika cilya. Iwe ni we Mrs. White. Iwe ufuma ku Fort Worth, Texas. Naukwata ubulwele bwa muli bakapafu, imibele ya lukanko. Uleumfwa ububi nganshi. Takuli isubilo kuli iwe, ukulingana fye nge fyo imiti ya science ingacita. Umulume obe, ena nakwata icakukabila ica bumupashi ico alepepelapo. Iwe naukwata umwana kulya, ena nakwata ubwafya ne numa yakwe, kabili no bwafya bwa mutima. Iwe naukwata akamulumendo akanono pa molu yakwe. Kalya ka mulumendo akanono nakakwata imilandile imo iyo ulepepelapo. Nga cilya cishinka, imya ukuboko kobe. [Umulume atila, “Cilya cishinka. Fyena fya kukabila fyesu.”]

“Uwapulishamo ni Uyo uuli muli imwe, ukucila uyo uuli mwi sonde.” Bushe mulecetekela cilya? [Ulukuta lwatila, “Ameni.”—Ka.] No mutima wenu onse? [“Ameni.”] Naonse fye? [“Ameni.”]

Nomba lekeni tukontamike imitwe yesu.

<sup>254</sup> Nomba Ena napita mucikulwa. Ena nashininkisha ukutila Ena ni Lesa. “Uwapulishamo, uyu Ena uli muli imwe, ukucila uyu uuli mwi sonde.” Cena ni Shikulu Lesa. Nomba, Ena uuli muli imwe, lekeni Wene akwate intanshi muli fyonse. Lekeni Wene akwate ukulandikisha ukwa—ukwa ifyo imwe. . .

Mwatila mu mutima wenu ino ine nshita, nga kuti mwacita, no mutima wenu onse, no kucicetekela, “Ubulwele ubwaciba mu mubili wenu na buya.” Mwamona? “Nshikwete nakabili ukucushiwa. Nshikwete nakabili ubulwele. Uyo uuli muli ine alipulishamo ukucila uyo uli mu mubili wandi. Uyo uuli mu mutima wandi alipulishamo ukucila uyo uuli mu mubili wandi. E ico kanshi, Ena uuli mu mutima wandi alengele Imyulu ne sonde. Umubili wandi naukantaikwa na Satana, kabili ndi tempile lya Mupashi wa Mushilo ku kwikalamo. E ico kanshi, Satana, ndekweba ukufuma mu mubili wandi. Mwi Shina lyakwa Yesu Kristu, fuma muli ine.” Mwamona? Bushe mulecicetekela? [Ulukuta lwatila, “Ameni.”—Ka.]

Nomba lekeni tupepe mu nshila yesu fwebene nomba, cila umo, ilyo ndemupepela.

<sup>255</sup> Lesa Impalume, Kalenga wa Myulu ne sonde, Umwine wa bumi, Usokolola inkama sha mu mutima, Mwatile, “Icebo cakwa Lesa Calitwa, ukucilo lupanga ulwa twila kubili kubili kabili Cilalingulula amatontonkanyo ya mu mutima.”

<sup>256</sup> Ilyo Icebo Calengelwe mu mubili, calishibe ifyo baletontonkanyapo, ilyo Ena alelingulula amatontonkanyo yabo. Ena ali Icebo, kabili Icebo calishibe inkama sha mitima yabo.

Kabili cilye Cebo cicili Icebo cimo cine. Kabili muno bushiku tulemona Cena ukuisokolola Icine muli ifwe, panuma ya myaka amakana yabili, pantu Ena alembele Cena pe pepala kabili ali pano ukucishininkisha, ukucilangisha, ukutila cena cishinka.

<sup>257</sup> Pano pali ututambala utubikilwe pano. Abantu abalwele bali ukuli konse. Ndepepa ukutila Umupashi wa Mushilo ukalamba uyo ulipo, uyo ulangisha ifi fintu, uyo ulanda ifi fintu, kabili tatala ukufilwa, lelo ico icili icalungama, tapali inshita nangu imo ilyo Cena cingafilwa, pantu Cena ni Lesa. Lekeni Wene asube utu tutambala no mulola Wakwe, no kundapa umulwele onse uo tukabikwapo. Kabili Lesa Uyo uwingaba uwa mweo, panuma ya myaka amakana yabili, kabili kuti ailenga Umwine mu mitima ya babembu abo aba lubulwa ku nkumbu ne citetekelo, kabili kuti alanda Ifyebo Fyakwe Umwine ukupitila mu milomo ifwa, no kucimona ukucitika filya fine fye ifyo Ena alaile.

<sup>258</sup> Mwe Shikulu Lesa, ndelomba Imwe ukuba no luse pali ifwe. Kabili lekeni umwaume onse no mwanakashi uyo wikele muno, uyo ukwete umusango onse uwabulwele atemwa ukucushiwa; kabili nga filya Mose aiposele umwine pakati, pa mulandu wa

bantu, muno bushiku ndebika umutima wandi ku cinso Cenu, Shikulu. Kabili ne citetekelo conse ico nakwata, ico cili muli imwe, ico Imwe mwampela, ndepela kuli bena. Nge fyo Petro asosele pa mpongolo itwa Iyaemba, “Nge fi ifyo nkwete, ndekupela. Mwi Shina lyakwa Yesu Kristu wa ku Nasareti, ima wende.” Kabili umwaume ali icilema kabili— kabili uwanakuka pa nshita ishinono, lelo, ilyo bamwikatilile, amafupa yakwe aya mututende yapokelele amaka. Kabili ena aingile mu Nga’nda yakwa Lesa, aletoloka, no kulumbanya no kupala Lesa.

<sup>259</sup> Imwe mwaba cimo cine mailo, ilelo, no muyayaya. Kabili abatumwa Bakwe batile, “Ifi ifyo nkwete, ndekupela.” Cali icitetekelo. Kabili ndesosa: ifi ifyo nkwete, ndepela kuli ili bumba! Mwi Shina lyakwa Yesu Kristu wa ku Nasareti, kanyeni ubulwele bwenu, pantu uwapulishamo ni Uyo uuli muli imwe, ukucila Kasebanya uyo ulesha ukusenda ubumi bwenu. Imwe muli bana bakwa Lesa. Imwe mwalilubulwa.


<sup>260</sup> Ndelando kutila Satana lekelako aba bantu. Lekeni Lesa Uyo uwasalangenye cilya cikuka ubushiku bumbi, Lesa Uyo uwalengele ifipupu kabili amabimbi ukuleka, lekeni Ena amone kuli cena ukutila ukulwala konse na kufumishiwa pali aba bantu, kabili amaka yakwa Kristu yamonekele mu bumi bwabo pali ino ora. Lekeni umubembu onse alapile. Lekeni umuntu onse, uyo ushapalama kuli Imwe, ailungamike pali ino ora. Kabili lekeni cibe fyo, mwi Shina lyakwa Yesu Kristu.

<sup>261</sup> Ine, nga pastor wenu, munyinenwe, ne citetekelo ico nkwete, ni nomba Lesa ukucibika pali imwe. Ndecetekela ukutila nalapokelela ico nombele. Nomba nga muli nokucetekela pamo na ine; pamo ne citetekelo ico nkwete, napela kuli imwe pali ino ora.

Kabili nomba, mwi Shina lyakwa Yesu Kristu, Umwana wakwa Lesa, kanyeni ukucushiwa kwenu, ubulwele bwenu, kabili soseni kuli bwena, “Ulingile ukuya,” pantu na mukwata icitetekelo, ukubikapo icitetekelo candi, na maka yakwa Yesu Kristu, Uyo ukubapo kwakwe kuli muno ku kucishininkisha no kushininkisha ukutila Ena ali muno, ali no kumulenga ukuba abatuntulu pali ino nshita.

<sup>262</sup> Bushe ulecetekela cilya, na mayo, weulele pali ubu busanshi? [Nkashi atila, “Cilya cishinka.”—Ka.] Nangula bakapafu bobo babe nga filya baciita, ukukosa kwa mafupa ne fintu, iwe kuti waenda nga walaesha. Iminina, mwi Shina lyakwa Yesu Kristu. Mwafwilisheni apo. Uyo uleima. Bushe ta mulecetekela? Imwe bonse mwe bashala, iminineni. Amafupa yakwe aya mututende na yapokelele amaka.

Nomba lekeni twimye amaboko yesu no kupela Wene amalumbo.

<sup>263</sup> Umukalamba Yehoba Lesa, mwi Shina lyakwa Yesu Kristu, twaipela fwebene kuli Imwe kukundapwa. Ameni. 

*UYO UULI MULI IMWE* BEM63-1110E  
(He That Is In You)

Iyi Mbila na Munyina William Marrion Branham yaletelwe intendekelo mu Cingeleshi pa Umulungu mu icungulo bushiku, Novemba 10, 1963, pa Branham Tabernacle, mu Jeffersonville, Indiana, U.S.A., yafumishiwa muli tape iyambulwa kabili nailembwa ukwabulo ukulundamo mu Cingeleshi. Uku ukwilula kwa mu Cibemba kwa lembelwe no kupelwa na ba Voice Of God Recordings.

BEMBA

©2009 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalembwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)